

Rom Quran

Polji Rom yoṅore Quran ruaya.

Mimitaniṅ

Rom sitio yauraine gobi maṅkekerisie kubuine kubuine yoṅoji botuyanṅo siṅsaṅ qarurouṅaru gobuṅ. Juda goineji manyaṅuṅ kerisieru Juda eeboboo eru Kadi buṅoo qakatoru Anuture moge sakiyaṅuṅo ketigaru joma so noku gobuṅ. Kotu kantrire maṅkekerisie kubu yoṅoji Anuture yaunmoririgo qakatoru Anuture Kadi buṅo rurumaṅgo so raru sigopou paiineo agiburaṅ afagaru enimiṅgo manebuṅ. (6.15) Anutuji Juda kufufuṅ foriine ṅadi yaberu tifeyaṅuṅo kotu ṅiṅigo oṅga yareko biṅeine fukebuṅ, ore eru goueru igosisi eyarebuṅ. (11.18-20) Oṅu eru Juda maṅkekerisie yoṅoji mosiyaṅuṅ raṅbaṅine oṅuakoṅ boyobebuṅ ore eru mipemiriṅ eyareku gobuṅ. Juda kubu yoṅoji kotu kantrire maṅkekerisie ogopuyaṅuṅ sure yaberu Juda mosiyaṅuṅ so boyobebuṅ ore eru buṅoyaṅuṅ fofoaṅ mitariku sigopou gobuṅ. (2.17-20; 14.3)

Qodure yabeṅ ore Polji kubu yoyoka yoṅore kajeqouṅ buṅo bubu quraṅga yareega. Juda yoṅore fuṅne barariṅga yareko (2.21-27) kotu kantri yoṅoji jeriebuṅ. Buṅo qoruine iṅi yajiya, “Yesu manesiṅ gabeneṅ Anutuji mamanesiṅnoṅuṅ ṅoneru buṅonoṅuṅ mitariko posikekiminṅ. Kadi furuine mo so pega.” (1.17) Kotu kantri ṅiṅigo sigokeiṅyaṅuṅ qomukuinṅ ore

funneyanun bararinga yareru inji yajiya: “Anutuji nono-nanunde finere eru matayon, inoyonunde nonemainde eru nono roosoe nabeya. (11.30-32) Ore eru yamej keku Kadi bunjo renjaru goinebi. (7.12-24) Sosowo yobu agiburande nigin gbedio goku egu sibirigakimin ore egobeneyon, (3.23; 5.12) Anutuji inoyonunde yombenji wakiin ore eru Kristo soreya. (5.8-9) Moro Tiriineji bomukuru agiburan nonemainde usungone pirue nobein. Ore eru agiburan eebobo bokeru (6.11-14) qodureru manjoko nadungadun eku yauraine yonore botugo yauraine onjine so goinebi.” Kajeqoun onjine yareme waigo waigo renjaru qodureru gobun. Polji daman funfungaine Rom rako kitin etebi jikigaru Spein morengo rainjo maneru onu quranaya.

Buk yoore mobe qoruine 7 oi inji:

Mimitanin bunjo eru bunjo qoruine 1.1-17

Sosowoji agiburande munanqoqore embimbinqagobonen 1.18–3.20

Anutuji munan qa noreega ore funjine 3.21–4.25

Kristoke gogo gariinere funjine 5.1–8.39

Israel yonoji Anuture mamanesu buruo gogobi 9.1–11.36

Mankekerisie ninore mosi eebobore bunjo 12.1–15.13

Bunjo tatariine eru inoyonere momojo bunjo 15.14–16.27

¹ Pol non Yesu Kristore gio bobo ni eru Rom mankekerisie ninigo nonoke bunjo mi manekimin ore wareru quran yo quranago. Anutuji onga nareko sosore ni aposol fukego. Anutuji Bobian Binjine misaueinjo ore roosoe nume gogo.

sosowo ñoñore eru Anutune danje miego. ⁹ Nonji mañ añine sosowo Anutune gioo ruaru kiñañine qaku Madeinere Bobiañ Biñe mitaniñgaego. Oo jijiki ñoño manesu ñareego, oi Anutuji kitiñgaku miega.

¹⁰ Damañ so inji miku oña wosiego, “O Anutu, nonji Rom yoñoreo rabemiñgo maneru damañ joroine odigago. Ore eru go añigore so minde kadi fukeko damañ yoo soine rabemiñ.”

¹¹ Ñone ñaberu mamanesiñ-ñañunji sanañgaiñ ore maneru soine gio bobore mamane yañ mo ñarebemiñ. Ore eru damañ fuñfuñgaine ñoñoreo wareru ñone ñabebemiñgo añi sogo maneru gogo.

¹² Inji ekimiñgo añi sogo maneego: Nonji ñone ñabebe qodureku noñ eru ñoño uruñu manesiñ gaegobeneñ, oi mimane eku manji kitiñgaku beufi eekimiñ.

¹³ O mañkekerisie ogopune, ñoño inji manesuku goinebi: Nonji kotu kantri goine yoñore botugo roregaru mañyañuñ bapakare yabebe kerisiebuñ, ore so ñoñore botugo oñuakon foriine fukeko ñonebemiñgo manego. Ore eru damañ kokoine ñoñoreo iqi warebeminde buru ruaru gobonyon, ya goineji damañine damañine kipe nuko embimbiñgaboñ.*

¹⁴ Anutune jinoo tife inji pe narega: Niñigo kubu fuñne fuñne bapi yabebeminde buñoji nonde paio pega. Niñigo mañgboroñyañuñke eru qanda (grasrut) yoñore kiñañqoqo sogokon fukego. Qoqodure buño Grik

* **1:13:** Apo 19.21

manegobi eru qanda* goku yonoyoyunde buñoji yayan miegobi, oi sosowo bapi ñabebemiñgo manego. ¹⁵ Oñu maneru Bobiañ Biñe oi Rom siti ñonore oñuakon mitaniñgabemiñgo afagaru joineke eego. Oñu.

Bobiañ Biñere usunñ oi inñi:

¹⁶ Anuture usunñi nonunñ sosowo qowirie nobeko damañ yoo Sombunde biñe fukegobeneñ. Juda niñoji rone mañnonunñ kerisieru oi manesiñ gabeneñ eru niñore ñadio kantri goine yonñoji oñuakonñ oi manesiñ garu mañyanunñ kerisiebuñ. Ore eru Anutuñi usunñine Bobiañ Biñeo ruako pega ore mimiganñanñ so eego.* ¹⁷ Bobiañ Biñeñi posiine fukekiminde funñe barariñga noreega. Biñe buño mo inñi qurañgabi pega, “Posiine fukega, inñoji mamesiñineñi mañgo eteko sanañgaru go ropeiñ. Buño ore funñe oi inñi: Niño Anutu funñgaru manesiñ gabeneñ mamesiñnonunñ ñoneru buñonoñunñ mitariko posikebeneñ eru moreñgo gokiminde so jikigaru manesiñ gaku jinñoineo posiine fukeekimiñ.” Oñu.*

Noñunde agiburande ore Anuture mañ rigañgaega.

¹⁸ Soine posiine fukenobenñonñ, niñigo buño foriine eeboboyanunñi kejigaru jijibu baegobi, Anutuñi oi Sombunñgo paibeone piku ñoneme so sagako mañine rigañgaega. Niñigo oñuine sosowo

* **1:14:** Qanda, Webo buñoo bus kanaka, niñigo gomenggo yonoyoye akonñ mutu goku mamane piyanunñ tomiri mo qanda gobun. * **1:16:** Mak 8.38 * **1:17:** Hab 2.4

ɲone yaberu wuwunɲayanɲun igogaru mosiyanɲun sembene ore eru rosiine barariŋga yareega. ¹⁹ Oi yoore eru: Anutire fuɲne mane mukukimiɲ ore so fukega, oi inoyone barariŋga yareme botunonɲunɲo totogo akon peko maneegobi.

²⁰ Anutire gogo so ɲoneegobeneyon, usunine oi Sombun moreɲ bofuke yaperu oone funɲaru noduru go wapeme damaɲ tatariine tomiri fukeru peega. Ore eru Anutire mequraɲ poretiɲ ɲonebeneney moreɲfun kuririineke fukega ore fuɲne soine mane mukukimiɲ ore so fukega. Ore eru ɲinigoji ya mogo gbedigaru yonoyanunde bunore mobeine kitiŋgaku miinɲo embimbiŋgaegobi. ²¹ Anutire fuɲne mane mukuru gobunyon, jibu “Inɲoji ofonononun,” onu so miku oi so miteɲ gabi tinabiɲeine botuyanɲunɲo so fukeya. Onu so fukeyayon, bunɲo omaine kosabasa manesubi mamanyaɲunji wirieko mutu fukebun. Maɲ mamane-mukuyaɲun tomiri oiji dabu eme qisiri eko tintun gogobi. Ore eru “Anutire fuɲne so manegobeney,” miku gbeɲbedi kosa ruabi so sagaga.*

²² “Maɲboron ɲinigo gogobeney,” miku sakiyanun ba ropeku gobunyon, onuine oo ɲinigo manyanun tomiri fukegobi. ²³ Anutu tinabiɲeine kuririquraɲineke damaɲ tatariine tomiri go ropein, oi so miteɲ gaku ohoweine so baku gobunyon, oi bokeru nemu gbɲon eru merofu sasako goine saribun. Nemu gbɲon pasikebi kamasiyanun ɲi komekiinere so fukegobi. Sasako goine babi webo, joma eru morenɲo beuyanunji

* **1:21:** Ef 4.17-18

peperu raegobi, yoŋore so fukegobi. Yoŋoji oi daberu moreŋfuŋ ore so miteŋ yaberu gobuŋ.*

²⁴ Oŋu eru gobuŋ ore Anutuji oi ŋadi yabeko yoŋoyaŋunde mande aŋi sanaŋine kosa boyoberu boesau eku yoŋoyaŋunde saki mimigaŋgaŋ qaku baba waki eku gogobi. ²⁵ Anuture buŋo foriine bokeru tifeineo buŋo ikoineo qakatobuŋ. Bobofuke Rauine fofori so araŋ baku kiŋaŋine so qaku gobuŋyoŋ, ya bofukeya me yoŋoyaŋunde meji babuŋ, ore aŋiine fukeko maneru mequraŋ yoŋore ohowe baku miteŋ yaberu gobuŋ. Oŋuine gobuŋyoŋ, niŋoji bobofuke Raunoŋuŋ oi damaŋ tatariine tomiri miteŋ gaekimiŋ. Buŋo oi fofori.

²⁶ Oŋu eru gobuŋ ore Anutuji oi ŋadi yabeko yoŋoyaŋunde aŋi sanaŋine mimiineke oi kosa boyoberu ini ebuŋ: Yoŋore ŋigopuji ŋoe ŋonuŋ kadi poretiŋ bokeru yoŋoyone akon kerisieru rorobaba eku gobuŋ. ²⁷ Ni yoŋoji oŋuakon ŋigoke rorobaba eku gogo bokeru kasigabi. Boesau eniminde aniyaŋuŋ sanaŋine oi ŋi botuyaŋuŋgo popore eku manebi joineke fukeko yoŋoyaŋekon kerisieru rorobaba eku wuwunuŋyaŋuŋke fukeru gobuŋ. Kasigabi qaŋgoqasa gobuŋ ore geoine oi Anutuji soyaŋuŋgo bokirie yareme paiyaŋuŋgo ropeko sembeabuŋ.

²⁸ Anuture fuŋne mane mukukimiŋgo manebi wawakiine fukeme bokebi Anutuji oŋuakon oi ŋadi yabeko yoŋoyaŋunde mamanesu kekesiineji siŋaŋ yabeko eebobo mimiineke eba eku gobuŋ.

²⁹ Eebobo kekesiine eru mosi sembene fuŋne fuŋne oiji manyaŋuŋ puŋeko ini eegobi: Ya

* **1:23:** Dut 4.16-18

ebu eku no roinḡo sase eru sinefuru eegobi. Goine yoḡore yare anda eegobi. Niḡigo yabebe komeegobi. Kekepari baku goine eadu yabee-gobi. Niḡigo goine koḡkoḡ paiineo sembene eyarekiminḡo maneegobi. Niḡigo kajeyanḡo buḡo sanu ebi rakame gbiḡo pougaru raega.

³⁰ Ḥadiqoqo buḡo miegobi. Anutire kane miegobi. Mosi sembene joineke reḡgaru boyobeegobi. Jauba-irinḡirinḡ eru sakiyanḡu ba ropeegobi. Sakigo rua eru mosi sembene furuine furuine bofukeegobi. Maḡgomama buḡoyanḡu so reḡgaegobi.

³¹ Mamaneyanḡu so tinḡako manyanḡu tomiri goku buḡo kosa kiperu so boyobeegobi. Oogo so eru goine yoḡore beusembe so maneru rosi eyareegobi. ³² Anutuji kadi poretinḡ inḡi mitigame pega: Niḡigo sembene oḡuine baegobi, yoḡoji kome sananḡ qanḡanḡinere binḡe fukeniminde so fukegobi. Yoḡoji mimiti oi mane taniḡagobiyonḡ, jibu yoḡoyonḡe sembene oi eegobi eru oḡuakonḡ matayonḡ, goineji oḡu ebi oi “Soine!” miku qotikeru kitinḡ yareegobi. Oḡu.

2

Anutuji buḡononḡu osoeru poretinḡ akonḡ mitariega.

¹ O ogone, go goine yoḡore buḡo mitariege me mata? Go goine yoḡore buḡo mitariku gake eebobo oi akonḡ baega. Ore eru ogogore buḡo mo mitarige ine, gakere buḡo oḡuakonḡ mitarinde ore goineji gakere paio ropeinḡ. Ore eru ropekiine me wawakiine fukege, oi jibu ya mogo gbedigaru

gakere buñore mobeine kitingaku mimiñgo em-bimbiñgaege.* ² Nñjigo eebobo sembene oñuine eegobi, Anutuji yoñore buño buño foriinere so osoeru mitariega, oi manegobeneñ.

³ Ore eru uruñu manesukuge? Go moreñ ñi eku jibu ya oñuine eegobi, yoñore buño mitariku gake eebobo oi akon ende sagaga me mata? Anutuji buñogo osoeru mitariku geoine bokirie gareko foriine gore paio ropeiñ. Anuture jinoo so kamieru sumuñgamiñ.

⁴ Anutuji ogo enoreru sembenenoñunde geo pipa so bokirieiñyoñ, odigaru maneku karieega, buño ore mipemiriñ ege me? Anutuji beufiine noduru mañgo kerisiemiñ ore kepore guega, ore mutu egu gomiñ. ⁵ Go kajegi eru mañgo so kerisiemiñ ine, oñuine oo Anuture jinoo mimi-gañgañ so kamiemiñyoñ, yombeneñeji gore paio saue ropeiñ. Rosi damañeñeji ware fukeme buñonoñuñ poretiñ akon mitariñ. Geoine bokirie noreiñ, damañ oo yombeneñe totogo barariñga noreme ñoneru manekimiñ.

⁶ Anutuji “Eebobonoñunde so moakon moakon noñunde tife bokirie noreiñ,” oi iñi:* ⁷ Anutuji tinabiñeine noreiñgo odigaru kuririnoñunke fukekimiñgo yameñ keku damañ so dimaku gio fiine fiine baku gogobeneñ, noñunde gogo sanañine noreiñ. Oi noreko damañ tatariine tomiri señginbañgiñ go ropekimiñ. ⁸ Oñuine go ropekimiñyoñ, ñiñigo yoñoyañunde akon manesuku qoqeqawaki baku Biñe buño foriine ñadi gaku buño sembene yobeegobi, Anuture

* **2:1:** Mat 7.1; Luk 6.37 * **2:6:** Kiki 62.12; Qoq 24.12

manji ore eru rigangako yombenine ruako paiyanunjo ropein. ⁹ Yombenine oi rone Juda ninjore paio ropeko ninjore ndio kantri goine eebobo sembene eegobi, sosowo yonjore paio onjuaon ropeko josereren sisikonkon maneru goniminj.

¹⁰ Onj goniminjon, Juda eru ninjore ndio kantri goineji onjuaon manyanun kerisieru eebobo fiine eegobi, Anuture kuririji sosowo nonjunde paio ropeko tinabine noreko womoo gokiminj. ¹¹ Anutuji ninjigo goine so njone anj eyareku goine so sure yabeegayon, so moakonjo osoe nobeega.*

¹² Ore funjine oi inji: Kantri goine yonjosi Anuture Kadi bunjo so osegaru maneru agiburan kosa baegobi, yonjosi sosowo mutu goku sibiriganiminj. Juda ninjosi Anuture Kadi bunjo osegaru maneru jibu agiburan eegobenenj, Anutuji bunjo ore so sosowo osoe noberu bunjononun mitariinj. ¹³ Ninjigo Anuture Kadi bunjo mo manee-gobi, yonjosi Anuture jinoo posiine so fukegobi. Matayon, Kadi bunjo renjaru boyobeegobi, Anutuji yonjore bunjo mitarime posikeniminj. ¹⁴ Kantri goineji Anuture Kadi bunjo so roru gogobiyon, goineji jibu kosa yonoyanunde anj so manesuku eegobi. Anuture kadi bunjo so manegobiyon, jibu mamanyaunji mitiga yareko Anuture kadi bunjore so eru ore rurumanjo gogobi.

¹⁵ Onj gogobi ore funjine oi totogo fukeru inji pega: Anutuji ninjigo bofuke noberu oo Kadi

* **2:11:** Dut 10.17

buṅore mimiti oi sosowo noṅunde maṅgo ruame pega. Ore eru Anutuji buṅoine miku saṅu eega, oi kotu kantri yoṅoji oṅuakoṅ manee-gobi. Oi maṅyaṅunde kajeji manebi buṅoyaṅuṅ yajiko Anutuke sogokoṅ manee-gobi. Anutuji maṅmamane yareya, oiji damaṅ goineo buṅo koroineo ruaru bapakare yabeko mane sembeae-gobi eru damaṅ goineo buṅoyaṅuṅ kitingaku miko maneru fiaegobi. ¹⁶ Bobiaṅ Biṅe mitaṅgaego, ore so damaṅ yasogoo iṅi fukeiṅ: Kristo Yesuji Anutu bapi gako ṅiṅigo noṅunde buṅo sumuṅine sumuṅine osoeru mitari noreiṅ. Oṅu.

Kadi buṅo oiji fuṅnenonṅuṅ uruṅu barariṅga norega?

¹⁷ Go gake tina Juda ṅi oṅgaku Kadi buṅoji munaṅqoqo egareṅ ore manesiṅ garu “Anutуре biṅe fukego,” miku sakigo miteṅ gande sagaga me mata? ¹⁸ Go Anutуре mi so gogore buṅo mane sarigaru goge. Anutуре Kadi buṅo qaji garebuṅ ore eru kadi fiine yobu boyobeiṅgo miku buṅo sosowo osoeru foriine eru ikoine botuyakuṅgo boroṅgaege. ¹⁹ Go “Soine jṅokombi ṅiṅigo ogo babapiyaṅuṅ fukeru oga yabebemiṅ,” miku gake sakipepe eege. Qisirigo gogobi, oi bataniṅ yabemiṅ ore so koimo fukege.

²⁰ Oṅu fukeru iṅi miege, “Kadi buṅo qaji norebi mamane-muku bofukeru buṅo foriinere fuṅne mane forego.” Oṅu miku aṅgaru iṅi miege, “Noṅ soine ṅiṅigo mamanyaṅuṅ tomiri yoṅore qaṅaji fukebemiṅ. Soine odumade yoṅore qaṅaji fukeru qaji yareebemiṅ.” ²¹ Oṅu miku goine qaji yareru

wamore gake so qaqaji eege? “Kian so roigon,” miku njinigo manyanun bapakare yabeegeyon, gake kian bobo fukende so sagaga.

²² “Boesau so eigon,” onu yajinde manebunyon, gake boesau ege me mata? Nemu gbon musombe eyaregeyon, jibu gake boji soringo roperu ya sabareku baa baege. Oi so sagaga.

²³ Anuture Kadi bunoke goge ore sakigo jibu ba ropegeyon, gake oi kigaru onuine oo Anuture tinabiye bawakiru eru gokande mimiineke fukeega. ²⁴ Ore bunoine oi Biye Quraᅅo ini quraᅅabi pega, “Nᅅore mosinaᅅunde eru kotu kantri kufufun yonᅅoji Anuture tina igobi eku botuyanunᅅo igosisi eegobi.”*

²⁵ Anuture Kadi bunᅅo boyoberu goge ine, Anuture moge sakigoo ketigabun, oiji bapi guko sagaga. Oi sagagayon, kadi bunᅅo kigaru agiburan eege ine, mogeine ketigakiine mata kamasi onu fukeru omaine kosa goge. ²⁶ Goineji Anuture moge sakiyanunᅅo so ketigabi jibu kadi bunᅅore mimiti boyobeegobi ine, Anutuji moge oi sakiyanunᅅo pega ore so ᅅone yabeme sagaga.

²⁷ Onuine ᅅone yabeme yᅅᅅoreone moji soine Kadi bunᅅore so gore bunᅅo akon osoeru mitarime wakiin. Anuture moge sakigoo ketigabi Kadi bunᅅore qoru moakon moakon maneru sabareku gogeyon, oi kigaru agiburan eege ore eru wakiin.

²⁸ Ni moji sakiji akon Juda ni fukega ine, inᅅoji Juda ni foriine so fukega. Onuakon Anuture moge sakiineo akon ketigabi qoqomuku eegobi ine, oi moge omaine, foriine tomiri.

* **2:24:** Ais 52.5

29 Foriine matayoŋ, ŋi mo maŋineji Juda ŋi fukega, inoŋi Juda ŋi foriine fukega. Onuakoŋ Anutuŋi maŋnoŋuŋ qopogaru Moroine Tiriine oo ruame goga, oiji moge foriine fukega. Kadi buŋore qoru boyoberu ŋi sakiine ketigabi moreŋ ŋiŋigoŋi manebi ropeegayoŋ, Anutuŋi mogeine maŋnoŋuŋgo dimaga ore maneko ropeme miter nuega. Onu.*

3

Anutuŋi buŋoine damaŋ so boyobeega.

1 Onu peko Juda ŋiŋigo gogobeney, buŋo oiji uruŋu bapi nobena? Anuture moge sakinoŋuŋgo ketigabuŋ, ore foriineji uruŋu fuke norega? 2 Foriineji gogo sosowo oo kokoine fukeru fori bapi nobeega. Ore buŋoine fuŋfuŋgaine oi iŋi: Anutuŋi Biŋe buŋoine noreko noŋunde biŋe fukeme gogobeney.

3 Onu gogobeneyoŋ, noŋundeone goineji Anutu so manesiŋ gaku gobi uruŋu eyareiŋ? Qoqomuku gobuŋ ore geoine bokirieru uruŋu enoreiŋ? Manji jojokoine kiperu sabareko omaine fukeiŋ me uruŋu? 4 Oi mata yobu! Noŋuŋ sosowoŋi ŋiŋigo ikoine fukegobeneyoŋ, Anutuŋi foriine yobu fukega. Anuture fuŋne oi Biŋe Quraŋgo iŋi quraŋgabi pega, “Buŋo koroineo ruaru weu garebi buŋogore tife mitaŋiŋgaru oo poretiŋ fukeru gbiŋ eyareru dimaigoŋ. Gore fuŋnego onu bofukeru kitiŋgaku minimiŋ.”*

* 2:29: Dut 30.6 * 3:4: Kiki 51.4

⁵ Nononun eebobo kekesiine boyobebenen Anutuji qotinga nobeko oo eeboboino poretin oiji to-togo fukega ine, nononun buɔo ore urunu minoben? Non buɔo oi moren ninigo mamanoonunde so inji migo: Anutuji goine bokirieme yombenineji painonunngo ropega, injore mamaneji onu kasi-gaga me mata? ⁶ Mata, oi use! Anutuji kekesiine fukena ine, injoji kaeine kaeine nonunde buɔo urunu osoeru poretin mitarina?

⁷ Nonji ni ikoine fukebe Anutuji buɔoine foriine oiji botinga nareko injore tinabiineji onu totogo fukega. Onu fukeko nonji agiburan ebon, Anutuji ore buɔoine urunure mitariga? Boke nuko nakene anigo gobe sagana me mata? Buɔoineji so wirieru wakiin. ⁸ Niɔo inji mibenen sagana, “Niɔo soine sembene jikigaru ebenen Anutuji oi botingako mosi finere foriji fukeko buɔoineji bineroroineke fukein.” Goineji injore buɔo rokaweru onu miku jikigaru inji miegobi, “Polji buɔo onu miku ore so kosa eega.” Onu eru mibun ore buɔoine oi Anutuji osoeru soyanunngo mitari yarein, oi manego. Onu.

Ninigo moji posine so fukega.

⁹ Buɔo onu mimane eku oi urunu mitarinoben? Juda ninoji kantri goine yadureru Anuture jinoo poretin fukegobenen me mata? Mata yobu! Ore buɔoine ronekon inji misanangaben: Juda me kantri goine fukenenen, nononun sosowo agiburan ebenen qukarie nobeko gogobenen. Ore eru sakinononun ba ropekimingo embimbingaegobenen. ¹⁰ Ore buɔoine oi Biɔe Quraɔo inji quraɔabi pega,

“Moji mo posiine poretiŋ so yobu fukega.*

11 Monde maŋgo mamane so fuke taniŋgako kosa gogobi. Moji mo Anutu bofukeiŋgo ore so yameŋ keega.

12 Matayoŋ, sosowoji kadi odureru jijibu gogobi. Sosowoji sembearu Anuturo jiiŋoo wuwununyaŋŋke fukegobi. Fiine fukeega, moakoŋ mo oi so yobu bofukego.

13 Namaŋyaŋunji sinefuru eegobi.

Nomeguyaŋunji jiiŋorunde yoŋ oŋuine aŋgaru dimako komere mumu oŋuine oiji ŋiŋigo kosa sibiri yabeegobi. Buŋo sembene oi qotire mi orabeŋ nombe oŋuine miyaŋuŋgo puseru peko miyaŋunji ŋiŋigo kosa kiyabeegobi.*

14 Buŋo mokiine soweinekeji mi bibiyaŋuŋ puseko ŋiŋigo kosa qaiso yareegobi.*

15 Ŋiŋigo kosa yaberu dariyaŋuŋ koŋganimiŋ ore kufuyaŋunji suronqoqo pipa ra wareegobi.*

16 Eeboboyaŋunde fuŋne kesigako gogobi ore soiyaŋuŋ iŋi fukega: Uro uro roregaegobi, oo ketoqototie ebi ŋiŋigo maŋyaŋunji sembearu jajabaega.

17 Womoo gogore fuŋne oi so mane mukugobi.

18 Anutu araŋ batekiminde buŋo oi maŋyaŋuŋgo so pega. Miine egu odureniminde kokoi so maneru mo kosa gogobi.”

Anuturo buŋo oŋu pega.*

* **3:10:** Kiki 14.1-3; 53.1-3 * **3:13:** Kiki 5.9; 140.3 * **3:14:** Kiki 10.7 * **3:15:** Ais 59.7-8 * **3:18:** Kiki 36.1

19 Anutuji Kadi buño yoore eru noreya, oi manegobeneŋ: Kadi buño sosowo oiji moreŋ so kipe nobeega. Noŋuŋ buño ore rurumaŋgo raru reŋgaru gobeneŋ sagaiŋ. So reŋgakimiŋ ine, Anutuji geoine bokirie noreko sibirigakimiŋ. Ore eru sombuŋoŋuŋ maneru gbegbedinoŋuŋ bokero buŋonoŋuŋ bokeko goku reŋga tebeneŋ sagaiŋ. Anutuji ŋiŋigo fuŋnenonoŋuŋ oŋu barariŋga noreko pega.

20 Kadi buŋoji kipe nobeegayoŋ, niŋo sosowo oi boyobekimiŋ ore embimbiŋgaegobeneŋ. Anuture Kadi buŋoji agiburaŋnoŋuŋ ba taniŋgako ŋoneru soine mane mukukimiŋyoŋ, kadi oo Anuture jiŋoo posiine fukekimiŋ ore embimbiŋgakimiŋ. Oŋu.*

Posiine fukekiminde fuŋne oi mamanesiŋ.

21 Niŋonoŋe embimbiŋgaegobeneŋyoŋ, Anutuji Kadi buño boyoberu posiine fukekimiŋ ore oi so miyayoŋ, kadi furuine iŋi burugaru miko pega: Anutuji iŋoyoŋe buŋonoŋuŋ mitarime iŋore jiŋoo posikekimiŋ. Anutuji buño oi Moses eru kajeqouŋ ŋiŋigo yoŋore barariŋga yareko kitiŋgaku miku Biŋe Quraŋgo quraŋgabi damaŋ yoo totogo fukeko manegobeneŋ.

22 Ore eru oone me oone noŋuŋ Yesu Kristo manesiŋ gagobeneŋ, Anutuji sosowo noŋunde buño mitarime posikekimiŋ. Niŋigo kubu furuine furuine noŋuŋ Anuture jiŋoo sogokon

* **3:20:** Kiki 143.2; Gal 2.16

fukegobenenj.* ²³ Njĩgigo sosowo nonjũ agiburaŋ eku Anuture kuririqurande eru embimbĩngagobenenj.

²⁴ Oi embimbĩngagobenenjyũ, Anuture yaũmoririji fukeko Kristo Yesuji duenoŋũ baya. Anutuji yaũ ore eru buŋonoŋũ mitarime posikekiminj. ²⁵ Rone agiburaŋ eru gobũ, Anutuji oi mane karieru geoine pipa so bokirie yareya. Oi so bokirie yareru injoyũnde eebobo posiineji totogo fukeinj ore maneru Kristo Yesu boji joma oŋuine fukeme qabi komeko Anuture jĩoo ke keririke norein ore fuŋine fukeya. Dariine koŋgaya, oi manesinj gabenenj oŋuine oo agiburaŋnonjũ jureru bokeme posikekiminj.

²⁶ Fuŋine oi damaŋ yoo totogo fukeinj ore maneru Yesu oŋu eteya. Anuture eebobo posiine oi inji: Injoyoŋe posiine fukega eru moji Yesu manesinj gaga, injore buŋo mitarime posikeega.

²⁷ Oŋu fukeko wamore sakinoŋũ ba ropenobenj? Ya more ore eru oi mata yobu. Kadi buŋo boyoberu posiine fukekiminj ore oi embimbĩngagobenenj. Oŋu oo posiine so fukekiminjyũ, Yesu manesinj gabenenj Anutuji ñone noberu buŋonoŋũ mitarime posiine fukeekiminj. ²⁸ Buŋo yo mitariku koruŋine inji misanaŋgobenenj: Kadi buŋo boyobeegobenenj ore matayoŋ, Yesu manesinj gagobenenj ore eru Anutuji buŋonoŋũ mitarime posiine fukeekiminj. ²⁹ Anutuji Juda niŋore Anutu akoŋ so fukega. Ino kantri goine yoŋore Anutu oŋuakoŋ fukega me mata? O yoŋore Anutu oŋuakoŋ

* 3:22: Gal 2.16

fukega.

³⁰ Anutuji moakon fukega. Ore eru sakinoŋun ketigabi gogobeneŋ, niŋoji manesiŋ gabeneŋ bofosike nobeega eru sakiyaŋun so ketigabi gogobi, oi oŋuakon manesiŋ gabun ore eru bofosike yabeega.* ³¹ Manesiŋ ganiminde buŋo miku oiji bapakare yaberu oŋuine oo Kadi buŋo bawaki ruabeneŋ omaine fukeiŋ me mata? Oi use matayoŋ, Anutire Kadi buŋo oi so kepieegobeneŋyoŋ, oi basanaŋgagobeneŋ. Oŋu.

4

Abrahamji Anutu manesiŋ garu posiine fukeya.

¹ Niŋo miminenoŋun Abrahamde fuŋnere uruŋu mikimiŋ? Inoji Anutire fuŋne uruŋu bofukeru iŋore jiŋoo posiine fukeya? ² Fofori, Anutuji iŋore buŋo oi eeboboine fiinere eru mitarime posikenobeŋ ine, iŋoji ore eru soine sakiine ba ropenayoŋ, oi Anutire jiŋoo mata. ³ Ore buŋoine oi Biŋe Quraŋgo iŋi quraŋgabi pega, “Abrahamji Anutu manesiŋ gako mamanesiŋine ŋoneme sagako buŋoine mitarime posikeya.” Buŋo oŋu pega.*

⁴ Buŋoine oi yaun mitarime posikeyayoŋ, moji gio bako siŋaŋineji furiine yaun matayoŋ, gio baega ore so ŋoneru osoeru furiine oteega. ⁵ Moreŋ siŋaŋi oŋu oteegayoŋ, Anutuji wuwunun ŋiŋigo noŋunde buŋonoŋun mitarime posiine fu-keekimiŋ. Ore eru moji seŋgiŋbaŋiŋ fukeiŋgo

* **3:30:** Dut 6.4; Gal 3.20 * **4:3:** Jen 15.6; Gal 3.6

ore gio so baku Anutu mo manesiŋ gaga, Anutuji mamanesiŋine oi ŋoneko sagako buŋoine mitarime posikeya.

⁶ Deiwidji oŋuakon buŋo ore fuŋine kitiŋgaku buŋo iŋi barariŋga noreru miya, “Moji seŋiŋbaŋgiŋ fukeiŋ ore gio so bame Anutuji mamanesiŋine ŋoneme sagako buŋoine mitarime posikeya, iŋoji kiwaqawaineke fukega.” ⁷ Oŋu miko buŋoine oi iŋi quraŋgabi pega, “Niŋigo Kadi buŋo kigabi Anutuji agiburanyaŋuŋ bokeru keririkeme gogobi, yoŋoji kiwaqawaineke fukegobi.*

⁸ Ofonji more agiburaŋ jureru ŋoneme sagako geoine paiineo so ruame ropeiŋ, iŋoji seŋiŋbaŋgiŋineke fukega.”

Buŋo oŋu pega.

⁹ Anutuji seŋiŋbaŋgiŋ fukekiminde fuŋne oŋu barariŋga noreru Anuturo mogenoŋuŋke niŋore akon miko pega me mata? Oŋu mata. Oi kantri goine mogeyaŋuŋ tomiri yoŋore oŋuakon pega. Niŋoji iŋi miku quraŋga foregobeneŋ, “Abrahamji Anutu manesiŋ gako mamanesiŋine ŋoneme sagako buŋoine mitarime posikeya.”

¹⁰ Iŋo wamo damaŋgo ŋoneko sagako buŋoine mitarime posikeya? Anuturo moge sakiineo ketigabi goya, damaŋ oo matayoŋ, rone mo goya, Anutuji damaŋ oo mamanesiŋine ŋoneme sagako buŋoine mitarime posikeya.

¹¹ Rone omaine goku Anutu manesiŋ gako buŋoine mitarime posikeya. Ore ŋadio sagaya ore mogeine oi sakiineo ketiganimiŋ ore miko moge

* **4:7:** Kiki 32.1-2

soiine oŋuine fukeya. Oŋu fukeko iŋore ŋadio Anutire mogenoŋuŋke so goku manesiŋ gabeneŋ mamanesiŋnoŋuŋ ŋoneme sagako buŋonoŋuŋ mitarime posikekimiŋ, Abrahamji sosowo noŋunde miminenonŋuŋ fukeya.* ¹² Miminenoŋuŋ iŋoji omaine goku damaŋ oo maŋine kerisieru Anutu manesiŋ garu goya, niŋo mogenoŋuŋke iŋore so eru gogobeneŋ. Anutire mogenoŋuŋke goku maŋnoŋuŋ kerisieru gogobeneŋ, niŋore miminenonŋuŋ oŋuakoŋ fukeya. Moge keti nobebi omaine kosa so gogobeneŋyoŋ, Abrahamde kufu kadi boyoberu manesiŋ gaegobeneŋ. Oŋu.

Anutire jojofo buŋo manesiŋ gabeneŋ foriineke fukeiŋ.

¹³ Anutuji Abraham moreŋ biŋe qa teme rauine fukeko osigidapuineji iŋore ŋadio oŋu go ropeniminde buŋo mikipeya. Buŋo oi Kadi buŋo boyobeya ore eru so ojiyayoŋ, Anutuji mamanesiŋine ŋoneme sagako buŋoine mitarime posiine fukeya ore buŋo oi ojiya.*

¹⁴ Goineji seŋgiŋbaŋgiŋ fukekimiŋ ore Kadi buŋoo qakatoru oŋuine oo Anutire ya oi biŋe qoqo enimiŋ ine, yoŋoji mamanesinde buŋo kepiebi omaine fukena. Oŋu Anutire jojofo buŋore so embimbiŋgabeneŋ buŋo oiji omaine egu fukeiŋ.* ¹⁵ Anutire Kadi buŋo kigabeneŋ maŋine rigaŋgako rosiineji painoŋuŋgo ropeegayoŋ, Kadi buŋo so pena, oŋu agiburande buŋo so minobeŋ.

* **4:11:** Jen 17.10

* **4:13:** Jen 17.4-6; 22.17-18; Gal 3.29

* **4:14:** Gal 3.18

16 Abrahamji oṅu qodure noreru sosowo noṅunde miminenonṅuṅ fukega. Ore eru jojofu buṅoine noreya, oi Kadi buṅoo qakatoegobi, yoṅore akonṅ matayonṅ, Abrahamji mane siṅgaya, oṅuine manesiṅ gabeneṅ noṅunde oṅuakonṅ foriineke fukeiṅgo maneya. Ore eru Anutuji jojofu buṅoine oi iṅi burugaru ruaya: Oi manesiṅ gabeneṅ foriine sosowo noṅunde yaunṅ noreko yaunṅmoririineji totogo fukeega.*

17 Abrahamde buṅo mo oi Biṅe Qurango iṅi qurangabi pega, “Nonji go bapakare gube ṅiṅigo kufufuṅ kokoine yoṅore mamayanṅuṅ fukemiṅ.” Buṅo ore so Abrahamji Anuture jiṅoo mama enoreega. Anutuji komekiine bogbore yabeega. Kufufuṅ gogoyanṅuṅ tomiri, oi jiṅoke gogobi ore kamasi oṅuine oṅga yareko fukeegobi. Abrahamji Anutu oṅuine manesiṅ gaya.*

18 Anutuji rone Abrahamde iṅi ojiya, “Gore osigidapugoji fukeru sauebi jareyanṅuṅ bobuṅ oṅuine fukeme gonimiṅ.” Jojofu buṅo oi maneru uruṅu foriineke fukena, oi so maneyayonṅ, oi jibu oori eru ṅiṅigo kufufuṅ kokoine yoṅore mama fukeiṅgo odigaru goya. Jojofu buṅo fuṅfuṅgainere so fukeiṅ ore Anutu manesiṅ gaku goya.* 19 Sarare woruṅineji odumade rorore so, so fukeme iṅoyonṅe gosaine 100 ore so go wapeya. Ore eru iṅoyonṅe manesuko ṅi pogo sakinine mujugaru gbanikine fukeyayonṅ, jibu Anuture buṅoji foriineke fukeiṅ ore manesiṅ gaku gokame Abrahamde mamesiṅji so gbanjiru wirieya.*

* 4:16: Gal 3.7 * 4:17: Jen 17.5 * 4:18: Jen 15.5 * 4:19: Jen 17.17

²⁰ So wirieyayon, buņoineji foriineke fukeiņ ore manesiņ garu oo sananġaru dimaya. Anuture jojofo buņo ore maņineji roġo wareġo so eyayon, mamananiņineji sananġako Anutu miteņ gaku gokame Anuture tinabiņeji saueya. ²¹ Anutuji ya fukeinde buņo miku kiperu oi ba foreiņgo sananġaega, oi mane sananġa foreru maņyoka mo so eku goya. ²² Oņu eku goya ore Anutuji Abrahamde mamananiņiņiņoneme sagako buņoine mitarime posikeya. ²³ Mamananiņine iņoneme sagako buņoine mitarime posikeya, buņo oi Abrahamde akon so quranġabi pega.

²⁴ Abrahamde akon matayon, nonunde ore eru oņuakon oi quranġabi pega. Nonuņ Ofoņnoņuņ Yesu bogboreme komegone pakereya, Anutu oņuine manesiņ gabeneņ mamananiņnoņuņ iņoneme sagako mitari noreko posikekimiņ. ²⁵ Anutuji nonunde agiburande ore eru Yesu so sabareko komeko eru posiine fukekimiņ ore eru bogboreme komegone pakereru goga. Oņu.*

5

Anuture iņiņoo posikeru jerieru womoo gogobeneņ.

¹ Nonuņ Anutu manesiņ gabeneņ buņonoņuņ mitarime posiķegobeneņ. Ore eru Ofoņnoņuņ Yesu Kristoji maņgo enoreko Anutuke womo bofukeru gogobeneņ. ² Oņuakon Yesu Kristo manesiņ gabeneņ maņgo enoreko yaunmoriri biņe ġoġo ekiminde fune bofukeru damaņ yoo yaunmoriri maņgo gogobeneņ. Anuture

* 4:25: Ais 53.4-5

kuririquran manjo ropenimiŋgo oori eru jerieegobeneŋ.

³ Ore akoŋ so jerieegobeneŋyoŋ, koŋkoŋ maneru ore eru oŋuakoŋ jerieegobeneŋ. Koŋkoŋ mane kariyeru oŋuine oo yamenyamen bofukekimin. Oi maneru ore eru jerieegobeneŋ.

⁴ Yamen keku eesoigo sananġaru dimakimin. Eesoigo sananġaru dimabeneŋ oorinoŋunji sananġaein.

⁵ Anutuji Moro Tiriine rua noreko kadi fukeme manjokoine kesieko manŋoŋunjo rakame gogobeneŋ. Ore eru oori eru seŋġinbaŋġin fukekimin ore eru odigaru mimiganġan so bofukekimin.

⁶ Ore fuŋine oi inji: Noŋun rone wiriine tobirinoŋun tomiri gobeŋ, Kristoji daman poretin oo akoŋ komeru ninjigo wuwununŋoŋunke noŋunde due baya. ⁷ Moji Kadi buŋo poretin boyoberu poretin fukega, ogoine oŋuinere moji soine so komena? Oi maneko embimbiŋanayoŋ, moji manjijojoko kokoine ninjigo eyareega, ogoine moji inore eru soine sakiine kisingaru komeinjo manena.

⁸ Ninjigoji oŋuine egobeneŋyoŋ, Anutuji manji jojoko noreega, inoji oi inji noduya: Inoji Kristo soreme wakiru rone wuwunun ninjigo gobeŋ, daman oo akoŋ noŋunde ore eru komeya.

⁹ Komeko daman yoo dariineji jureru mitari noreko posikeru gogobeneŋ. Jibu oi wawakiine oŋuine fukeme foriineji jiki inji fukein: Anutuji agiburande manjo totogo yaduko ya mokiineke morenjo fukein. Oi fukeko Anuture jinoo posiine fukegobeneŋ ore Yesuji yombeŋ oone bomuku nobeko seŋġinbaŋġin bofukekimin.

¹⁰ Nonuŋ rone Anuture rosipu goben, daman oo inoyonunde Made soreme komeru inoji furinonun fukeme Anutuke oogo fukeben. Fukeben, oiji muraŋine fukegayon, foriineji jiki ini fukein: Furinonun ruame Anuture ogopuine gobenen Yesuji sananŋaru goga ore afagaru bomuku nobeko seŋinbanŋin bofukekimin. ¹¹ Ofonononun Yesuji Anuture munanŋoŋo gio bame Anutuji furinonun bame inoke oogo fukeben, onuakon matayon, fofori Anutuke manjoko nadunŋadun eku dimaku kokorian eru jerieegobenen. Onu.

Adam inore eru komebenyon, Kristore eru gborekimin.

¹² Ni moakonji agiburan morenŋo kesueko fukeya. Anutuji agiburande geo ruame kome fukeya. Ore so ninigo sosowoji agiburan eru gobenen komeji ore so ninigo sosowo saga nobeko gogobenen.* ¹³ Rone Kadi bunjo so fukeme daman oo onuakon agiburan totogo fukeru eforeyayon, Kadi bunjo so peko agiburande bunjo oi so miku osoeru kosa gobun.

¹⁴ Adamde damanŋone funŋaru kosa go wapebi Mosesre damanŋo Kadi bunjo fukeya. Ninigo daman botuineo oo agiburan ebunyon, Adamji kadi kigaya, ore so akon so kigaru gobunyon, komeji jibu oi onuakon sinan yabeko gobun.

Adam, ni funfunŋaine inoji ni mo wareinde soso fukeya.

¹⁵ Sosoine fukeyayon, funneyakun oi sogokon so fukegobire. Adamji Kadi bunjo kigaru wakiko agiburan fukeru saueru ninigo kokoine saga

* 5:12: Jen 3.6

yabeme komeru gobuŋ. Oi komere fuŋne fukegayoŋ, senŋinbaŋŋiŋ fukekiminde fuŋne oi mo. Oi iŋi: Ni moakoŋ Yesu Kristo iŋoji maŋgo enoreru yaunmoririine barariŋga noreko Anutture yaunji totogo fukeru niŋigo kokoine sagaru isiri nobeya. ¹⁶Jikigaru iŋi mibemiŋ: Kadi yoyoka oi sogokoŋ so fukegobire. Ni moakonji agiburaŋ eko Anutuji buŋoine mitarime agiburaŋ niŋigo sosowo noŋuŋ misi korure biŋe fukebeŋ. Oi moreŋ nire fuŋne fukegayoŋ, Sombuŋ nire fuŋne oi mo. Oi iŋi: Damaŋ kokoine Anutture Kadi buŋo kigabeneŋ yaunine noduru mitari noreko posiine eegobeneŋ.

¹⁷ Oi moke mibemiŋ: Ni moakonji Kadi buŋo kigaru kome kesueko niŋigo sosowo komeru gogobeneŋ. Adamde agiburande eru komeji sosowo sagaru siŋaŋ nobeko kosa gobeŋ. Oi kadi wakiŋoŋoine fukegayoŋ, Anutu usunde fuŋne oi iŋi: Niŋigo noŋuŋ posiine fukekiminde yaun oi boakoŋ yobu biŋe ŋoŋo eku yaunmoririinere maŋgo gogobeneŋ, noŋuŋ senŋinbaŋŋiŋ bofukekiminŋ. Ni moakoŋ Yesu Kristo iŋoji kitiŋgaku dobe nobeko ŋonemeŋoti oŋuine sanaŋgaru go ropekiminŋ.

¹⁸ Moke jikigaru mibemiŋ: Ni moakonji Anutture Kadi buŋo kigaru wakiko Anutuji buŋoine mitarime niŋigo sosowo noŋuŋ misi korure biŋe fukebeŋ. Oŋuakoŋ ni moji posiine fukekiminŋ ore kesueko maŋnoŋuŋ kerisiebeneŋ Anutuji soine niŋigo sosowo noŋunde buŋonoŋuŋ mitarime posikeru sanaŋgaru go ropekiminŋ. ¹⁹ Oŋuakoŋ moke mibemiŋ: Ni moakonji ŋoŋomuku eru ag-

iburan qoru eteko saueme n̄n̄igo boakon̄ non̄un̄ kerisieru agiburan̄ n̄n̄igo fukeben̄. On̄uakon̄ n̄i moji Anuture mi ren̄garu agiburan̄non̄unde furi bame kadi fukeko Anutuji n̄n̄igo boakon̄ non̄unde būnon̄on̄un̄ mitarime posikekimin̄.

²⁰ Rone omaine kosa go wapebun̄yon̄, Mosesre daman̄go Anutuji Kadi būno n̄n̄igo agiburan̄yan̄un̄ mane mukunimin̄ ore jikiga yareya. Oi jikiga yareyan̄on̄, oi manebi agiburan̄yan̄un̄ji sauere totogo fukeya. On̄u fukeme Anutuji yan̄moririine on̄uakon̄ basaueme agiburan̄ odureru fukeya.

²¹ Agiburande usun̄ oi yasogo. Ore eru agiburan̄ ebenen̄ oiji sin̄an̄ nobeko komekiine fukeru go wapeben̄. Anuture yan̄moriri oiji on̄uakon̄ usun̄ineke fukega. Yesu Kristo Ofon̄non̄un̄ji posikekimin̄ ore kesueko Anutuji būnon̄on̄un̄ mitarime poretinḡaru gogo sanan̄ine bofukeru daman̄ tatariine tomiri go ropekimin̄. On̄u.

6

Agiburan̄ n̄adi gaku Kristoke gboreru gonimin̄.

¹ Anutuji yan̄moririine noreko sauein̄ ore agiburan̄ jikigaru eru gokimin̄ me mata? Ore eru urun̄u mikabenen̄ sagain̄? ² Agiburan̄ oi use! Nīno agiburande nigin̄gone n̄eririkeru man̄non̄un̄ ran̄gbaineji qon̄gbun̄ on̄uine fukeme agiburan̄ ekimin̄ ore useru gogobenen̄ ine, urun̄ure agiburan̄ji jikigaru sin̄an̄ nobeko gonoben̄?

³ Būno yo manegobi me mata: Non̄un̄ sosowo Kristoreo qakatokimin̄ ore eru miti meso rau norebun̄. Oo man̄non̄un̄ ran̄gbaineji Yesu qabi

komeya ore kamasi komeko gokimiŋ ore miti meso oi rau nobebuŋ.

⁴ Mamaji kuririguranine noduru Kristo bogboreme komegone pakereya, noŋunde manji oŋuakoŋ gboreko gariine fukeru gobeneŋ sagaiŋ. Mamanoŋunji noŋuŋ Kristore kamasi oŋuine gboreru pakereru eebobo gariine eba eku gokimiŋgo manega. Ore eru miti meso oi yoore eru rau norebuŋ: Maŋnoŋuŋ raŋgbaineji Yesuke moko komeru peiŋ ore maŋnoŋuŋ raŋgbaine oi oŋuine yaŋgabuŋ.*

⁵ Maŋnoŋuŋ raŋgbaineji Kristoke sogokoŋ komeko oo iŋoke qakatoru gogobeneŋ ine, Mamanoŋunji noŋuŋ oŋuakoŋ Kristoke dimakiminde manega. Kristoji komegone pakereya, iŋore kamasi sogokoŋ gboreru gobeneŋ sagaiŋ. ⁶ Maŋ sakire aninoŋuŋ sanaŋine sembeneji agiburaŋ ekimiŋ ore sase eega, Anutuji aŋi oi ketotieme rakaiŋgo maneega. Anutuji agiburaŋi jikigaru siŋaŋ nobeko kiŋaŋine qaku gokimiŋgo so manega. Ore eru maŋnoŋuŋ raŋgbaine oi Kristoke maripoŋgo qame komeya. Ore so gogobeneŋ, oi manegobeneŋ.

⁷ Monde maŋine raŋgbaineji komeko iŋoji ag-iburande niginŋone ŋeririkeru goga. ⁸ Maŋnoŋuŋ raŋgbaineji Kristoke komeya ine, oŋuakoŋ iŋoke gboreru goku sanaŋgakiŋgo manesiŋ gagobeneŋ.

⁹ Oŋu manesiŋ garu Kristore fuŋne iŋi peko mane mukugobeneŋ: Anutuji oi bogboreme komegone pakereru goku sanaŋgaru moke so

* **6:4:** Kol 2.12

komeiṅ. Komeji oi so jikigaru siṅaṅ gako go ropeiṅ. ¹⁰ Kome komeya, oṅuine oo daman moakonṅ oo agiburande usuṅ ketotieme damanṅ tatariine tomiri wiriine pe ropeiṅ. Gogo sanaṅine goga, oi Anuture go ropeiṅ. ¹¹ Goṅgbuṅ yoṅoji agiburaṅ enimiṅ ore embimbiṅanimiṅ. Noṅo oṅuakonṅ noṅo-ṅaṅunde manebi qoṅgbuṅ oṅuine fukeme Kristo Yesuke qakatoru dimaku Anuture sanaṅaru goinebi.

¹² Sakiṅaṅuṅ komeiṅ, ore aṅi sanaṅine sembeneji siṅaṅ ṅabeko oi reṅgaru agiburaṅ egu enimiṅ ore oi kiperu goinebi. ¹³ Ore eru saki tifeṅaṅuṅ sosowo oi agiburaṅ Rauinere meo so ruainebi. Raru oṅu ruabi biṅeine fukeko qoru eteko wuwunuṅ egu fukeiṅ. Oṅuine matayoṅ, komegone gboreru noṅo-ṅaṅe Anuture meo ruru einebi. Saki tifeṅaṅuṅ sosowo oi Anuture meo ruabi biṅeine fukeko maṅgo eteko eebobo posiine fukeeiṅ. ¹⁴ Noṅo Kadi buṅo ruru maṅgo matayoṅ, yaṅmoriri maṅineo gogobi. Ore eru agiburaṅji omaine kiperu siṅaṅ ṅabeko egu goinebi. Oṅu.

Posiine gogore Raure kiṅaṅ qaku goinebi.

¹⁵ Ore eru uruṅu minobenṅ? Noṅuṅ Kadi buṅo ruru maṅgo matayoṅ, yaṅmoriri maṅineo goku agiburaṅ ebenenṅ sagaga me mata? Oi use! ¹⁶ Rau yoyoka fukegobire. Noṅo-ṅaṅe yokoreone more meo ruru eku miine reṅgaru kiṅaṅine qaegobi, ore eru buṅo yo mane mukuinebi: Noṅo mo miine reṅgaegobi, iṅore kiṅaṅqoqopu fukegobi. Agiburaṅ Rauinere kiṅaṅqoqopu fukegobi ine, iṅoji oga ṅabeme kome sanaṅine komenimiṅ.

Anuture mi reŋgaru kiŋaŋine qaegobi ine, iŋoji buŋoŋaŋuŋ mitarime posiine fukeru go ropen-imin.

¹⁷ Nŋoŋo rone agiburaŋ Rauinere kiŋaŋqoqopu fukeru gobuŋ. Oŋu gokabi Biŋe buŋoji botin ŋabeeŋgo qaji ŋarebi manebuŋ. Oi maneru ore so maŋ-ŋaŋuŋ kerisieru damaŋ yoo Biŋe buŋo poretin reŋgaru Anuture kadi boyobeegobi. Oŋu maneru ŋoŋore eru “Anutu danŋe!” miku gogobeneŋ. ¹⁸ Oi boyoberu agiburande niginŋone ŋeririkeru Anuture kiŋaŋ qaku eebobo posiine eba eku gogobi.

¹⁹ Maŋsakiŋaŋuŋ wiriine fukega ore eru buŋo ore fuŋine oi moreŋ ŋiŋigo noŋunde buŋo mimire so nonji inŋi mibemin: Nŋoŋo rone saki tifeŋaŋuŋ sosowo useru jauba Rauinere (Satande) meo ruaru kiŋaŋ qa gobuŋ. Oŋuine gokabi eebobo wuwunuŋineke fukeru maŋ-ŋaŋuŋ kejiŋako gobuŋ. Oŋuine gobuŋyoŋ, damaŋ yoo saki fu tifeŋaŋuŋ sosowo oi useru Anuture meo ruainebi. Oŋu ruaru kiŋaŋ qabi eebobo posiine fukeko gbagbataeŋine fukeeinebi.

²⁰ Nŋoŋo agiburaŋ Rauinere kiŋaŋqoqopu gobuŋ, damaŋ oo eebobo posiine oi so boyobebuŋyoŋ, ŋoŋo-ŋaŋunde aŋigo kosa gobuŋ. ²¹ Damaŋ yoo eebobo ore mimiŋaŋuŋ manegobiyon, damaŋ oo oŋu eru goku foriine uruŋu bofukebuŋ? Eebobo mimiineke ore foriine oi kome sanaŋine.

²² Damaŋ yoo Anutuŋi agiburande niginŋone pirue yabeme ŋeririkeru Anuture kiŋaŋqoqopu fukebi foriine fukeko gbagbataeŋine fukeegobi.

Oŋu fukeru gogo sananine goku tatariineo senŋinbaŋin bofukeru go ropenimin. ²³ Agiburaŋ ebeneŋ Rauineji furi noreko kome sananine bofukekiminyon, Anuture yaun oi senŋinbaŋin gogo. Kristo Yesu Ofonnonunke qakatoru dimakimin ine, sananŋaru tatariine tomiri go ropekimin. Oŋu.

7

Noe nonun gogore soso buŋo

¹ O maŋkekerisie ogopune, nono Kadi buŋo manegobi ore so inŋi najibemin: Kadi buŋoji nŋinigo kipe nobega. Morenŋo go ropekimin ore so ore yukuineo gokimin, nono oi manegobi me mata?

² Ore sosoine mo oi inŋi: Kadi buŋoji nigo noeineke kipeme nŋi goin ore so noe nonun gonimiyon, noeineji komein ine, nonunineji noe nonun gogore Kadi buŋoone neririkein.

³ Ore eru noeineji sakike gome ni more Oŋ miko roin ine, inore tina jikiboti nigo miegobeneŋ. Oŋu miegobeneŋyon, noeineji komein ine, Kadi buŋo oiji so jikigaru kipeme goin. Oŋuine goku ni mo roin, inoji jikiboti nigo so fukein.

⁴ Ore eru maŋkekerisie ogopune, nonore fuŋneji oi onuakon pega. Nono onuakon ni more bine fukemin ore Kristoke qakatobun. Anutuji oi bogboreme komegone wapeko gogononunji foriine Anuture bofukeme fukein ore maneege. Kristoji komeko maŋ-ŋanun ranŋbaineji inoke komeko qonŋbun onuine fukeru Kadi buŋore bine so gogobi. ⁵ Rone maŋ sakire anŋi sananine sembeneji sinan nobeko kosa gobeŋ. Daman

oo Kadi buṅoji boburoru bapakare nobeko agiburaṅ ekiminde aṅinoṅuṅ sanaṅine sembeneji fukeru siṅaṅ nobebuṅ. Ore eru maṅ sakinoṅunji pakere me gogonoṅunji kome sanaṅinere fori bofukeru kosa gobenṅ.

⁶ Oṅuine gobenṅoṅ, rone buṅo oiji kipe nobeko witiineo goku kadi buṅore qoru moakonṅ moakonṅ boyobekimiṅ ore yameṅ keku gioine baku gobenṅ. Kristoke qakatoru dimabeneṅ maṅnoṅuṅ raṅgbaineji inoke komeko damaṅ yoo kadi buṅore biṅe fukebenṅ oone ṅeririkeru moke kiṅaṅine so qaegobeneṅ. Damaṅ yoo fuṅnenonoṅunji gboreko Moro Tiriineji dobe nobeko afagaru Anuture gio baegobeneṅ. Oṅu.

Agiburaṅ egu ekimiṅ ore yameṅ keku jogbasanaṅ eegobeneṅ.

⁷ Ore eru uruṅu minobeṅ? Kadi buṅo inoyone agiburaṅineke fukega me mata? Oi use! Kadi buṅoji agiburande fuṅne nadume manebonṅ. Kadi buṅo mo inṅi pega, “More yare so sase eigoṅ.” Oṅu so mina ine, nonṅi yare sase eego, ore fuṅine so mane mukunobo. Ore eru Kadi buṅo so mane mukunobo, oṅuine agiburaṅ so mane mukunobo.*

⁸ Kadi buṅo so pena, agiburaṅi buṅo omaine eru komiine fukena. Oṅuine fukenayoṅ, mimiti buṅo manebe dobu kipe nuko oi kigabeminde fuṅne fukeko agiburaṅ ebe fukeya. Mimiti buṅoji bapakare nuko maṅne pakere me aṅine sanaṅine sembene fuṅne fuṅne oi poretiṅ fukebi sembene ore kosa sase eego. ⁹ Rone Kadi buṅo so maneru

* 7:7: Eks 20.17; Dut 5.21

mutu gobonyon, mimiti buṅo manebe oiji sabare nobeya ore agiburande anjiji gboreko maṅne pakereko oi ebon. Agiburaṅ ebe qokome nuko komiine fukebon.

¹⁰ Anutuji mimiti buṅo oi boyoberu goku sanangabemiṅgo mane nuyayon, buṅo oi boyobebemiṅgo soebe qokome nuko komiine fukebon. Komeine fukebon, oiji totogo fukeko bofukebon. ¹¹ Mimiti buṅo mane mukube dobu kipe nuko oi kigabeminde fuṅne fukeme mimiti buṅoji bapakare nuko agiburanji eadu nareko oi ebon. Agiburaṅ eru buṅoneke fukebon. Onjuine oiji Anuture mimiti buṅo oiji agiburaṅ maṅgo eteko ebe qokome nuko komiine fukebon.*

¹² Onjuine fukebonyon, jibu Kadi buṅo oiji mokiine eru gbagbataenine fukega. Ore mimiti buṅoineji oi poretiṅ eru fiine fukega. ¹³ Onjuine fukeko mimiti buṅo fiine oiji qokome nuko komiine fukebon me mata? Oi use! Buṅo fiineji matayon, Kadi buṅoji nakene agiburande fuṅne barariṅga nareko mane mukubon. Agiburande mimi totogo fukeko mokiineke manebemiṅ ore eru mimiti buṅo oiji agiburande dobu kipeme maṅneji pakereko kigaru agiburaṅ ebon. Nake agiburaṅne oiji qokome nuko komiine fukebon. Onju.

Maṅneo agiburande mamari peko gogo.

¹⁴ Moro Tiriineji Kadi buṅo noreko poretiṅ fukega, oi manegobeneyon, nonji agiburaṅ ni fukeru anine sananine sembeneke fukego. Waki

* **7:11:** Jen 3.13

qabe agiburanji siŋaŋ nuko reŋgaru kiŋaŋine qaku agiburaŋ eego.

¹⁵ Ore eru ya fiine eiŋgo maneego, oi so eego. Oiyon, ya sembene ebemiŋgo useru misomben eego, nonŋ oi eego. Ore eru ya eego, nonji ore fuŋine soine so mane mukuego.* ¹⁶ Ore eru ya sembene eiŋgo tataki eru oi eego ine, Kadi buŋoji jibu fiine fukega. Kadi buŋore nonŋ maŋmoakon ego.

¹⁷ Onu fukeme nonji nake oi so jikigaru eegoyon, agiburaŋ maŋneo pega, oiji bapakare nuko oi eego. ¹⁸ Eebobo fiine ebeminde anjifofori maneegoyon, oi ebeminde usunji so fuke nareega. Ore eru nonde maŋneo ya fiine mo so pegayon, maŋsakineji agiburaŋ ebemiŋgo ore bapakare nareega, oi manego. ¹⁹ Ore eru ya fiine ebeminde anjimaneeego, oi so baegoyon, ya sembene so ebemiŋgo maneego, oi eego. ²⁰ Onu fukeko ya ebemiŋgo useego, oi jibu baego ine, oi nake so jikigaru baegoyon, agiburaŋ maŋneo pega, oiji bapakare nuko oi eego.

²¹ Ore eru nakene fuŋne inji peko bofukeego: Ya fiine ebeminde anjimaneebe sembenere anjimanee kipeme quŋgaego. ²² Ore fuŋine oi inji: Maŋneji Anuture Kadi buŋore maŋmoakon eru reŋgabemiŋgo maneego.

²³ Onu maneegoyon, saki funeo nakene fuŋne inji peko bofukeego: saki funere tife yonŋoji agiburande qoru fukebi ebemiŋgo maneego. Agiburaŋ ebeminde anjimanee anjine fiine oi bawaki ruaingo maneko jogbasasanaŋ eegobire. Agiburaŋ

* **7:15:** Gal 5.17

ebeminde anjine sananjineji saki funere tifeine tifeine boburo yaberu kipe nuko nigin witio gogo. ²⁴ O nonji sembea foreru wuwunujneke fukego. Manjakinere anj sembeneji oga nuko kome sananjine egu komebemiŋgo ore moji duene baku munan qa narena?

²⁵ O Yesu Kristo Ofoŋne, inoji manjo enareko “Anutu danje!” migo. Fuŋneji onjine fukeme nake manjeji akonj Anuturo Kadi bujore ruru-manjo raru kinanjine qaegoyonj, saki fune agiburanjineke onjineji agiburanj ebeminde anjine sananjineji kipe nuko ore nigin witio gogo. Onju.

8

Moro Tiriineji oodesinononj fukeko sananjaru gogobenenj.

¹ Ore eru njinigo Kristo Yesuke qakatoru dimagobenenj, Anutuji nonjunde bujo mitarime daman yoo misi korure binje so fukeru gogobenenj. ² Ore fuŋine inji: Go agiburande anj reŋgaru gomenj ore eru kome sananjinere binje fukeru gomenj. Onjine gomenjyonj, Kristo Yesuke qakatoru dimande gogo sananjinere Moroji kome sananjinere niginjgone pirue gareko gogo.

³ Njinigo manj sakinonjongo anjinoŋonj sananjine sembene oi pega. Oi boyobebenenj Kadi bujore tobiriji wirieru gogo sananjine noreinjo embimbinjako qunjabenenj. Qunjabenenj manj sakinonjoni agiburanj eru gobenj, Anutuji agiburanj ore bujohne mitariku tifeine inji bokirieya: Inoji

inyoyonunde Made soreme morengo wakiru agiburan nire saki onjuine fukeya. Jikigaru agiburande boji kamasi onjuine fukeko rigabi komeya. Anutuji gogo sananinere fune onju bataningaya.

⁴ Anutuji fune oi yoore eru bataningaya: Kadi buñoji nonun posiine eru poretin gokimin ore mitiga noreega, Anutuji buño ore foriineji nonunde fuke forengo maneya. Ore eru mansakinonunde ani sananine sembeneji so sinan nobeingo useru Moro Tiriinere man ani rengakimin ore dimaegobenen. ⁵ Ninigo mansakiyanunde ani sananine sembene boyobeegobi, yonore manyanunji agiburan einjo ore pega. Ninigo Moro Tiriinere ani boyoberu eegobenen, nonunde manji Moro Tiriinere eebobo ekimin ore pega. ⁶ Mansakinonunde ani sananine sembeneji furu nobeko kome sananine oobe rakimin ore pegayon, Moro Tiriineji mannonungo womo eme sanangaru gokiminde ani maneega.

⁷ Anutuji Kadi buño noreko agiburan ekiminde ani sananineji buño ore rurumango so raega. Oi rainjo embimbingaga. Oi embimbingako kosa goku mannonunji Anutu igogaru rosi eteegobenen. ⁸ Ninigo man sakire aniyangun sananineji sinan yabebi kosa gogobi, yonoji Anuture jinoo saganimin ore qunganimin.

⁹ Yonoji qunganiminyon, Anuture Moro Tiriineji nonore mango goga ine, inoji sinan nabeko gogobi. Man sakire aniyangun sananine sembene yonoji nono so sinan nabeeegobi. Kristore Moro Tiriineji more mango so rakame

omaine goga, iñoji Kristore biñe so fukega. ¹⁰ So fukegayoñ, Kristoji ñoñore maño goga ine, saki fuyañunji agiburande eru komenimiñyoñ, iiruñanunji posiine fukegobi ore eru sanan̄garu go ropenimiñ. ¹¹ Anutuji Kristo Yesu bogboreme komegone pakereya, iñore Moroñi mañ-ñan̄un̄go goga ine, yokoji ñoño Anutuke qakatoru dimakabi sakiñan̄un̄j komekiine oi oñuakoñ bogboreniimi.*

¹² O mañkekerisie ogopune, gboreru gogobeneñ ore niñoji Anuture tifeke gogobeneñ. Mañ sakire an̄inoñun̄ sanan̄ine sembene boyobeniminde tife matayoñ, Moro Tiriinere mi reñgaru gokiminde tifeji oi pe norega. Ore eru noñunde an̄igo kosa egu gokimiñ. ¹³ Mañ sakire an̄iyañun̄ sanan̄ine sembene boyoberu gogobi ine, ñoño kome sanan̄inere biñe fukenimiñ. Oñu fukenimiñyoñ, Anutu oñga wosibi Moro Tiriineji mañsakiñan̄unde eebobo sembene bokomeeiñ ine, oñuine oo gboreru sanan̄garu go ropenimiñ. ¹⁴ Anuture Moroñi ñiñigo qotiñgaru oga yabeko gogobi, yoñoji sosowo Anuture odumadepu fukegobi.

¹⁵ Gemokaku yoñoji ñiñigo boburo yabebi gburugburu yabeko kiñan̄qoqo omaine fukeru gogobiyoñ, ñoño gemo oñuine oi mo matayoñ, Moro Tiriine oi biñe qoqo eku gogobi. Ore eru ñoño moke jikigaru kokoi paio egu goinebi. Moro Tiriine iñoji qowirie ñabeme Anuture odumadepu fukegobi. Moro oiji boburo nobeko Anuture

* **8:11:** 1 Kor 3.16

“Aba* Mama!” oṅgaegobeneṅ.* ¹⁶ Anutуре odumadepu fukegobeneṅ, buṅo oi Moro Tiriineji inoyoye nonunde iiruke qotikeru moko kitingaku miegobire.

¹⁷ Anutуре odumadepu fukegobeneṅ ine, inoji inoyoyunde ṅinḡopuine nonunde ore senḡinbaḡinḡ bomogako pega, oi oṅuakonḡ raugakiminḡ. Anutuji Kristore ya bomogako pega, oi oṅuakonḡ Kristore qaḡaḡo dimaku raugakiminḡ. Kristoke moko joiserereṅ maneegobeneṅ ine, oṅuakonḡ Kristore kuririquraḡineo roperu inoke moko tamaeru gokiminḡ. Oṅu.*

Gogo kuririquraḡinekeo roperu gokiminḡ.

¹⁸ Damaḡ yoo joiserereṅ maneru gogobeneṅ, oiji gogo wakiqoqoine fukega. Jiki Kristore kuririquraḡo roperu tamaeru senḡinbaḡinḡ gokiminḡ, oiji gogo ropekiine kuririineke fukeinḡ. Gogo yoyoka oi mobemobe eru osoekiminḡ ore so mata. Oṅu manesugo. ¹⁹ Anutuji joma eru ya sosowo bofukeme pegobi, yoḡoji odigaru Kristoji wareru Anutуре odumadepu bomukuru yaduko kuririquraḡ fuke yareinḡ ore aḡi sogo maneegobi.

²⁰ Anutuji joma eru ya sosowo bofukekeyayonḡ, yoḡoji goku komeru mataeniminḡ. Yoḡoyanḡunde aḡire so matayonḡ, Anutuji inoyoyunde aḡire so oṅu burugaya. Ya sosowo mataeniminḡyonḡ, jibu oori yareme senḡinbaḡinḡ inḡi fukeinḡo odigae-gobi.* ²¹ Anutuji joma eru ya sosowo bofukeme

* **8:15:** Aba oi Arameik buṅoo mama. * **8:15:** Mak 14.36; Gal 4.6 * **8:17:** Gal 4.5-7 * **8:20:** Jen 3.17-19

pegobi, yoŋoji oŋuakon yoore eru odigaegobi: Anutuji oi oŋuakon wuwunuŋ gogore niginigone pirue yareme so komeru goregaru mataen-imiŋyoŋ, Anuture odumade oŋuine ŋeririkeru kuririquanyaŋuŋke tamaeru pe ropenimiŋ.

²² Ore fuŋine oi iŋi: Anutuji joma eru ya sosowo bofukeme pegobi, yoŋoji sosowo moko nakafe poreru odumade rorore goji kiyabeega, oŋuine maneru pe waperu damaŋ yoo oŋuakon eegobi, oi manegobeneŋ. ²³ Anutuji joma eru ya sosowo bofukeme pegobi, yoŋoreone matayoŋ, Anuture bobosu fukebeneŋ Moroine Tiriine yaun noreko gogobeneŋ, noŋuŋ oŋuakon maŋnoŋuŋji nakafe poreru goegobeneŋ. Anutuji oga nobeko odumadepu fuŋine mo fukekiminŋo odigaru goku nakafe eegobeneŋ. Oga noberu duenoŋuŋ bako sakinonŋuŋ fuŋine mo raugaru Sombuŋo roperu fiaŋgo ore aŋi sogo maneru gogobeneŋ.*

²⁴ Oŋuine qowiriekimiŋ ore oori eru maŋnoŋuŋ kerisieru Sombunde biŋe fukekiminŋ. Ya fukein ore oori eegobeneŋ, ore foriine fukeko ŋonebeneŋ oorinoŋuŋ oŋuine oiji tariinŋ. Moji yare foriine fukeko ŋoneru ore ooriine oi so jikigaru eru odigaega. Oi mata. ²⁵ Yare foriji so fukeko ŋoneegobeneŋ, ore oori egobeneŋ ine, oi yameŋ keku fukeinŋo odigabeneŋ maŋnoŋuŋ so wakiega.

²⁶ Oŋuakon wiriebeneŋ Moro Tiriineji bapi nobeega. Uruŋu oŋga wosikabeŋ sagana, oi so manegobeneŋyoŋ, Moro Tiriineji inoyone oŋgawowosi gionoŋuŋgo bapi noberu noŋunde

* **8:23:** 2 Kor 5.2-4

³³ Anutuji ñijigo inoyonunde roosoe noberu bujononun mitarime posikeegobeneñ, ore eru moji buño koroino rua nobena? ³⁴ Kristo Yesuji komeko Anutuji moke bogboreme Sombuño roperu Anuture me furoineo ñeku jikigaru nonunde eru onga wosiega. Ore eru moji mo bujononun osoeru misi korugo rakakimiñ ore mitari noreiño embimbiñgaiñ.

³⁵ Kristore manjoko manineo gobeneñ moji oone boroiña nobeko wakinobeñ? Suroñqoqo enorekabi koñkoñ manenobeñyon, Kristore manjokogone soine so wakikimiñ. Kekesuesue enorenobunyon, oone soine so wakikimiñ. Roro bofukenebeñ me kambañ sokinoñunji mataeme gonobeñ, soine so wakikimiñ. Egu komekiminde kokoi paio gonobeñ me jigo qabi rosi fukenayon, soine so wakikimiñ. ³⁶ Ore buñoine oi Biñe Qurango inñi qurangoñ pega,

“Gore tinare eru kae fufurere akon fungaru nobebi komekimiño manebi ragu kae ubu eega. Lama yaberu noegobi, onjuine akon niñore manesuegobi.”*

³⁷ Buño ore so enorenobunyon, Kristoji manjokoine barariña nobeko manebeñ, inoji kitiñ nobeko yobiñ sosowo oo gbiñ eru kokorian eru gokimiñ. ³⁸ Ya moji Kristore manjokoineone boroiñ nobeiño embimbiñgaiñ. Oi foriine yobu mane mukugo. Komeji me gogore yaine moji boroiñ nobeiño embimbiñgaiñ. Sombun mimerereñ me gemokaku yonoji damañ yoo me jiki niño boroiñ nobenimiño embimbiñganimiñ. Apa

* **8:36:** Kiki 44.22

ɲaso ɲonemeqoti usunyanunke yonɔoji oi embimbiɲganimiɲ.

³⁹ Paibere paibe me yukire yukuineo gogobi, yonɔoji boroiɲ nobenimiɲgo embimbiɲganimiɲ. Anutuji yareya goine mo bofukeme pegobi, yonɔoji onɔuakon Anuture manjoko oone boroiɲ nobenimiɲgo embimbiɲganimiɲ. Anuture manjoko oiji Kristo Yesu Ofoɲnoɲun inoreo fukeko barariɲga noreme oi manegobeneɲ. Onu.

9

Anutuji anjinere so Israel roosoe yabeya.

¹ Nonji Kristoke qakatoru dimaku buɲo ikoine matayon, buɲo foriine yobu mo mibemiɲ. Moro Tiriinere buɲore kaje ruabe buɲone kitiɲgaku misanaɲgaru maɲneo saɲu enareko inɲi maneru migo: ² Nonji Juda ɲinɲigo goine yonɔore beusembe bubuji nuko maɲneo joiserereɲ yasogo tatariine tomiri inɲi ore maneego:

³ Yonɔoji noke moreɲ sakiji Israel kufufun moakon fukego-beneɲyon, manyanunji Kristoke so qakatoru kosa gogobi. Nonji Israel ogopuneji manyanun kerisienimiɲgo jogbasanan eego. Anutuji yonɔore buɲoyanun osoeko nake yonɔore tifeyanun fukebe goine bokirieru nonde paio inɲi ropeiɲgo manego: Inɔoji non Kristo inoreone boroiɲ nuko misi korure biɲe fukeiɲgo manego.

⁴ Yonɔoji Israel kubu maɲineo gobi Anutuji oga yabeme biɲeine fukegobi. Anuture tinabiɲe osigaru kuririyannunke fukegobi. Anutuji yonɔoke senɲinbanɲin fukeniminde jojofu ranɲbanɲine eru gariine eru Kadi buɲo yareya. Ore eru boji

soriŋgo roperu Anuture ohowe baku miteŋ gae-gobi. Anutuji mifiaine saueinde buŋo kipeya, ore foriineji fukeiŋgo odigaegobi.* ⁵ Yoŋoji mimi-nenoŋuŋ Abrahamde osigidapu yoŋore ŋaso madepuyanŋuŋ gogobi. Kristoji yoŋoreone moreŋ saki fu roru ŋi fukeya. Kristoji Anutunoŋuŋ fukeru ya sosowo siŋaŋ gako tinaine damaŋ tatariine tomiri miteŋ gaekimiŋ. Buŋo oi fofori.

⁶ Oŋuine gogobiyon, Israel kufufuŋgone fukeru saueru gogobeneŋ, noŋuŋ sosowo jibu Israel ŋiŋigo foriine so fukegobeneŋ. Ore eru Anuture buŋoji tiriko usuŋineji wawakiine fukeega me? Oŋu minobeŋ, oi buŋo foriine mata. ⁷ Abrahamde osigidapu yoŋoreone fukegobeneŋ ore eru sosowo noŋuŋ Anuture odumadepu so fukegobeneŋ. Oŋu matayon, Anutuji Abrahamde iŋi ojiya, “Aisakre ŋaso madepuji goreo jikigaru tinago osigaru go ropenimiŋ.”*

⁸ Buŋo ore fuŋine oi iŋi: Abrahamde osigidapu moreŋ ŋiŋigo mosiji odumade fukeegobeneŋ, sosowo noŋuŋ Anuture odumadepu so fukegobeneŋ. Oŋu matayon, Anutuji buŋo kipeme pega ore so fukebeŋ, Anutuji niŋo maneru noreko Abrahamde osigidapu foriine fukegobeneŋ. ⁹ Jojofu buŋo oiji Abrahamdeo iŋi wareko maneya, “Gosa moakon tariko oo moke wareru ŋone gube Saraji madeineke fukeiŋ.”*

¹⁰ Buŋo oŋu maneko iŋoreo oi fukeyayon, oo so tariya. Iŋore ŋadio Rebekare oŋuakon Anuture buŋore so fukeya. Apanoŋuŋ Aisak iŋoji ŋonoŋine

* 9:4: Eks 9.4 * 9:7: Jen 21.12 * 9:9: Jen 18.10

injo kua oteko madeyokayakuᅇ gboᅇbodo fukebu.
 11 Gboᅇbodo yokoᅇi beu maᅇneᅇo ᅇneku so fukeru
 ya fiine me sembene mo so ebu, Anutuᅇi damaᅇ
 oo made yokoreone mo inᅇoyonunde roosoeya.
 Inᅇoyonunde mamane buruᅇi sananᅇaru foriineke
 fuke foreinᅇ ore eru gboine roosoeya.

12 Inᅇoyonunde maᅇ anᅇi foriineke fukeinᅇ
 ore eru Rebeka inᅇ oᅇiya, “Kakaineᅇi gboinere
 kinanᅇoᅇo fukeru mea rurunanᅇo goinᅇ.” Anutuᅇi
 onᅇ oᅇiru eeboboyakuᅇ eenobu ore so oi so osoe
 yapeyayonᅇ, inᅇoyonunde anᅇiine akonᅇ boyoberu
 gboine onᅇa teme kakainere soguine fukeya.*

13 Ore buᅇoine oi Biᅇe Qurannᅇo inᅇ quranᅇabi
 pega, “Jeikob maᅇneᅇi manᅇoko eteru gobonyonᅇ,
 Esau (Iso) oi use teru rosi eteru gobonᅇ.”*

14 Buᅇo ore urunᅇu minobonᅇ? Anutuᅇi poretinᅇ
 so fukeᅇa me? Onᅇuine mata yobu! 15 Anutuᅇi
 Mosesre buᅇo inᅇ oᅇiko pega, “Nonᅇi nake anᅇe
 boyoberu mo wamo ᅇoneru embonᅇ eru ᅇonemainᅇ
 etebeminᅇo manego, oi ᅇonemainᅇ eteego. Mo
 wamore beusembe etebeminᅇo migo, inᅇore oi
 beusembe maneego.”* 16 Buᅇo ore eru moreᅇ
 ᅇiji Anutu so sinanᅇ gaegayonᅇ, yare anᅇiine maneru
 einᅇo esoigaru bibienayonᅇ, oi jibu Anutu so
 odureinᅇ. Anutu inᅇoyonᅇ yaunᅇmoririre so ya
 sosowo sinanᅇ gako inᅇore meo pega.

17 Anutuᅇi farao kinᅇ buᅇo oᅇiko Biᅇe Qurannᅇo inᅇ
 pega, “Nake binᅇerorone misauebi moreᅇ sosowo
 saganᅇo manego. Onᅇu maneru usunᅇe bararinᅇa

* 9:12: Jen 25.23 * 9:13: Mal 1.2-3 * 9:15: Eks 33.19

yarebe totogo fukeiᅅgo bapakare gube goji fukemenᅅ. Fukeru goku kiso enareku gokande gbiᅅ egareboᅅ.”* 18 Buᅅo ore so Anutuji iᅅoyoᅅunde aᅅi boyoberu mo ᅅoneru embonᅅ eru ᅅonemaiᅅ eteiᅅgo manega, oi ᅅonemaiᅅ oteeiᅅ eru more maᅅ kebojigabeminde manega, oi kebojigame qoqomuku fukeeiᅅ. Oᅅu.

Anuture yombeᅅ eru ᅅonemaiᅅ

19 ᅅoᅅoreone moji nonde iᅅi mina, “Oᅅu fukeme sosowo noᅅuᅅ Anuture maᅅ aᅅi kiso etekimiᅅgo embimbiᅅgaegobeneᅅ. Oᅅu fukeko Anutuji wamore jikigaru minoreega?” 20 Moji oᅅu minayoᅅ, moreᅅ ᅅi go wamo fukeru Anutu kiso eru kekepari etena? Mequranji iᅅoyoᅅunde bobofuke Rau iᅅi soine so miteiᅅ, “Go wamore kamasi yo oᅅuine bofuke naremeᅅ?”* 21 Dero bobo ᅅiji iᅅoyoᅅunde usuᅅ paio aᅅiinere so afe kerisieru roosoeru afe moakonᅅ oone gbakeᅅ furuine furuine baega. Goine damaᅅ so roru gio oteegobeneᅅ eru goine kuririyauᅅke oi jeri damaᅅineo akonᅅ gio oteegobeneᅅ.

22 Anutu bobofuke Raunoᅅunji oᅅuine akonᅅ enoreega. Iᅅoji yombeᅅine ᅅiᅅigo noduko usuᅅine ᅅoneru manekimiᅅ ore maneega. Oᅅu maneru maᅅine rigaᅅgame rosiineji ᅅiᅅigo goine yoᅅore paio ropeko jaueru ketotie yabeᅅgo eru goya. Oi jibu geoine pipa akonᅅ so bokirie yareyayoᅅ, yoᅅore eru joiserereᅅ kokoine mane karieru maᅅyauᅅ kerisieniminde odigaru goya.

* 9:17: Eks 9.16 * 9:20: Ais 29.16; 45.9

²³ Onjine akonj yaunmoririine bararinga yareko boakonj yobu fukeinggo maneega. Onj maneru njinggo kuririine raugakiminj ore roosoe nobeya, nonjnj njone noberu embonj nobeme kuriri-ineke tamaegobenej. ²⁴ Nonjnj onj akonj onjine fukekiminj ore onga noreya. Juda njinggo akonj matayonj, kotu kantriine kantriine oi onj akonj onjine fukeniminj ore onga njareya. ²⁵ Anutuji ore bujone miko kajeqounj nj Hosea injore quranjgo inji pega,

“Njinggo nakene kufufunpu so fukeru gobunj, nonji oi onga yarebe nakene kufufunj fukeniminj. Goineji nakene wombunj ogopu so gobunj, yonjore ‘Nake wombunj ogopune,’ onj miku gobeminj.”*

²⁶ Nonji morenj more njinggo yonjore inji miku gobonj,

‘Njono nake kufufunpune so gogobi.’ Onj miku gobonjonj, oi morenyanjungo oone onga yareru tinayanj inji mibeminj: Njono Anutu gogo Rauinere odumadepu fukegobi. Qaqotinj onjine fukeinj.”*

²⁷ Aisaiaji onj akonj Israel kufufunj njore eru inji kuyoku miya, “Israel njinggo jarenonj koe magenj ore so fukena ine, oi jibu njoreone afaineji manjonj kerisiebenej munanj qa nor-einj. ²⁸ Ofonji morenjine morenjine sosowo nonjunde bujo afaine osoeru mitariku goeine sosowo bokirie nore foreinj.”*

* **9:25:** Hos 2.23 * **9:26:** Hos 1.10 * **9:28:** Ais 10.22-23

29 Aisaiaji oŋu miku ronekoŋ buŋo mo miya, ore foriineji niŋoreo iŋi fukega, “Ofon usun sosowore Raunoŋunji osigidapunoŋun goine so ŋone yaberu emboŋ eru manyaŋun kerisienobun ine, moreŋnoŋunji Sodom oŋuine kerisieme rakame misi jana. Niŋoji Gomora ŋiŋigo oŋuine sibiriganobun. Anutuji oŋuine enorena.” Oŋu miya.*

Israel boakoŋ yobuji Anutu qoqomuku eteebi.

30 Ore eru urunŋu minobeŋ? Kantri goineji Anuturu jiŋoo posiine fukekiminde gio so yameŋ keku babun, yoŋoji Anuturu jiŋoo posikegobi. Manyaŋun kerisieru Anutu manesiŋ gabi ore eru buŋoyaŋun mitarime posiine fukeru gogobi. 31 Oŋu gogobiyon, Israel niŋoji posiine fukekiminde Kadi buŋo boyobekimiŋ ore yameŋ keku go waperu oi jibu Anuturu jiŋoo so posikebeŋ.

32 Ore fuŋine oi iŋi: Yoŋoyoŋe akoŋ esoiku eebobo poretiŋ eku oŋuine oiji posiine fukekimiŋ ore yameŋ keku Yesu so manesiŋ gabun. Iŋoji ko sanaŋ qanqanine oŋuine fukega, iŋoreo odetatanŋaru yabeko qunŋaru ŋadi gabun. Ore eru posiine so fukebun. 33 Ore buŋoine oi Biŋe Qurango iŋi quranŋabi pega,

“Ŋnoneniŋ, Anutu nonji aeŋ ko mo Zaion tukuo Israel kubu manyaŋunŋo saribe yoŋoji oo odetatanŋaru wakiru yabeko ŋadi gaenimiŋ. Moji ŋi yoine sanaŋ qanqanine oi manesiŋ gateiŋ, iŋoji damanŋ mogo iŋore dimaku mimiganŋan so bofukeiŋ.” Oŋu.*

* 9:29: Ais 1.9 * 9:33: Ais 28.16

10

¹ O maŋkekerisie ogopune, nonji nakene Juda kufufunpune manyanun kerisienimin ore anjine sogo maneeego. Anutuji munan qa yarein ore manne qojugaru yonore eru Anutu onga wosiego.

² Yonore funjeji ini pega: Yonoji Anuture manjo eegobiyon, oi qaqouma paio eegobi. Yonore bunjo onu kitingaku migo.

³ Anutuji bunononun mitarime posikegobenen, ore funjine so mane mukuku yonoyone akon es-oigaru posiine fukekimingo yamen keegobi. Onu eru Anutuji bunononun mitarime posikekimin ore miega, bunjo ore rurumanjo so raru qungaru mo kosa gogobi.

⁴ Kristoji inoyone akon Kadi bunjo boyobe foreya. Niŋo goineji oi embimbingaru Kristo manesin garu maŋnonun kerisiegobenen, onu Kristore eru Anuture jinoo posikegobenen. Onu.

Anutuji nonun sosowo munan qa noreinjo manega.

⁵ Mosesji Kadi bunjo boyoberu onuine oo posiine fukekiminde bunjo oi ini qurangame pega, “Kadi bunjo boyobe forein, inoji ore eru gogo sanajine bofukein.”*

⁶ Bunjo onu pegayon, maŋnonun kerisieru manesin gakabenen Anutuji bunononun mitarime posikegobenen, Mosesji ore eru bunjo ini miko pega, “Maŋgoo ini manesuku egu mimin: Ni moji Sombun kaeo ropena?” Niŋigoji oi Kristo ogagaru wakiin ore kosa mibun.* ⁷ Me “Ni moji kome kaere dikiineo

* **10:5:** Lew 18.5 * **10:6:** Dut 30.12-14

rakana?” Niṅigoji oi Kristo ogagaru komegone pakereṅ ore kosa mibuṅ.

⁸ Onu miku jikigaru iṅi miya, “Biṅe buṅo oi jorigo matayoṅ, gore migoo eru maṅgoo pega.” Biṅe buṅo oi manesiṅ ganimiṅ ore pega. Niṅoji buṅo oiji ṅiṅigo maṅ bapakare yareru iṅi mitaṅga ṅareegobeneṅ: ⁹ Anutuji Yesu bogboreme komegone pakereya. Goji buṅo oi maṅ wombuṅgoji manesiṅ garu mi bibigoji “Yesuji Ofoṅne fukega,” onu mifukege ine, iṅo munanṅ qa gareko qowiriemiṅ.

¹⁰ Go maṅ wombuṅgoji Biṅe buṅo manesiṅ gande Anutuji buṅogo mitarime posikemiṅ eru mi bibigoji Yesu mifukende munanṅ qa gareko qowiriemiṅ.

¹¹ Biṅe Qurande buṅo mo iṅi mibi pega, “Moji oi manesiṅ gaiṅ, iṅoji mimiine so maneiṅ.”*

¹² Anutuji Juda ṅiṅigo so ṅone aṅi eyareku kantri goine so sure yabeega. Ofoṅ moakoṅ iṅoji sosowo noṅunde Ofoṅ fukeru so moakoṅgo osoe nobeega. Niṅigo oi oṅga wosiegobeneṅ, noṅuṅ sosowo mifaine boakoṅ yobu noreega.

¹³ Ore buṅoine oi Biṅe Qurango iṅi pega, “Niṅigo uri yoṅoji Ofonde tina oṅga wosiniṅ, iṅoji oi sosowo munanṅ qa yareko qowirienimiṅ.”*

¹⁴ Niṅigoji Ofoṅ so manesiṅ gaku iṅore tina oi uruṅu oṅga wosinobuṅ? Iṅore fuṅne so mikabi manebuṅ, oi uruṅu manesiṅ ganobuṅ? Moji Biṅe buṅo so mitaṅgainṅ ine, yoṅoji oi uruṅu manenobuṅ? ¹⁵ Niṅigo mo Biṅe buṅore so sorekimiṅ ine, iṅoji uruṅu raru oi mitaṅgana?

* **10:11:** Ais 28.16 * **10:13:** Joel 2.32

Ore buņoine oi Biņe Qurango inji qurangabi pega, “Niņigo Biņe buņo fiine roru wareegobi, yoņore kadi fonuņyaņuņ manebeneņ anjiine yobu fukega.”*

¹⁶ Oņu qurangabi pegayoņ, nonde Israel kufufuņ foriine yoņoji Bobiaņ Biņe so reņgaru gogobi. Ore buņoine oi kajeqouņ ni Aisaiaji inji nojime pega, “O Ofon, niņo Biņe buņo misauebeneņ moji maņine kerisieru oi manesiņ ganamen?”* ¹⁷ Buņo ore so Kristore buņo misauebeneņ kajeyaņuņgo rakako manebi mamananiņaņuņji oņu fukeiņ.

¹⁸ Mamanesiņ oņu fukeiņyoņ, inji weu ņarego: Biņe buņo oiji Juda yoņore kajego so rakako manebuņ me? Mata, oi manebuņ. Ore buņo oi inji mibi Biņe Qurango pega, “Buņo mibi buņoyaņuņji oi ra wareru moreņ sosowo sagaya. Oi moreņine moreņine paibe yukube mobemobe oo manebuņ.”*

¹⁹ Buņo ore so Biņe buņo oi manebuņyoņ, moke jikigaru inji weu ņarego: Israel niņigoji oi mane taniņgabuņ me mata? Mosesji ronekoņ buņo inji miya,

“Niņigo kufufuņ maņkekerisiere fori tomiri nonji oi muņaņ qa yarebe ņoņore maņyaņuņgo ore eru manetiņotike fukeiņ. Kotu kubu qaqouma gogobi, yoņoji ņoņo ņadurebi mosi oiji Juda ņoņore maņ bapakarebe maņ-ņaņuņ rigaņgame maņ-ņaņuņji pakereiņ.”*

²⁰ Aisaiaji sanangaru dimaku inji miko pega,

* **10:15:** Ais 52.7 * **10:16:** Ais 53.1 * **10:18:** Kiki 19.4

* **10:19:** Dut 32.21

“Niñigo nonḡ so baa nuru kosa gobuḡ, yoḡoji nonḡ bofuke nubuḡ.

Niñigo nonde fuḡnere so weuku gobuḡ, nonji fuḡne oi yoḡore barariḡga yarebe ḡoneru manebuḡ.”*

²¹ Yoḡore oḡu miyayoḡ, Israel niḡore buḡo iḡi no-jime pega, “Una so kae fufurere akonḡ fuḡgaru qo-qomuku kufufuḡ kajeboji fukeegobi, ḡoḡo non-deo warenimiḡ ore oḡga ḡaberu mewori qaku gobe kae ubu eega.” Oḡu.*

11

Israel maḡineo maḡkekerisie kubu mendaine pega.

¹ Ore eru iḡi weugo: Anutuji iḡoyoḡunde kufufuḡ ḡadi nobeya me mata? Oi mata yobu! Nonji oḡuakon Abrahamde osigida mo fukego. Nake Israel kufufunde kubu tinaine Benjamin iḡore maḡgo gogo.* ² Anutuji ronekonḡ iḡoyoḡunde kufufuḡ roosoe nobeya, niḡo so ḡadi nobeko gogobeneḡ. Kajeqouḡ ḡi Elaijare (Eliare) binanḡ oi Biḡe Qurango qurangoabi pega. Iḡoji Anuture iḡoo Israel niñigo miyareru oḡga wosiya, ḡoḡo buḡo mobeine oi manegobi me mata? Buḡo oi iḡi, ³ “O Ofonḡ, yoḡoji gore kajeqouḡ ḡiḡigopu yabebi komebi gore boji ririga alataine alataine ketoqototiebuḡ. Nonḡ moakonḡ boke nubi gobe kamieru rubaru nuiḡgo jauegobi.”*

⁴ Oḡu miyayoḡ, Anutuji oi maneru iḡi bokirieru ojiya, “Go gake akonḡ so gogeyonḡ, nonji ḡi 7,000

* **10:20:** Ais 65.1 * **10:21:** Ais 65.2 * **11:1:** Fil 3.5 * **11:3:** 1 Kij 19.10, 14

onʉakon sa kipe yabebe nakene biŋe fukeru nemu ikoine Bal oi so dikanji ke teru goke jikigaru gogobi.”* 5 Buŋo ore so daman yoo onʉakon Anuture kubu mendaine pega. Anutuji yaunmoririinere so ŋiŋigo afaine roosoe nobeko gogobenŋ.

6 Yaunmoririineji oi mango eteko roosoe nobeya. Niŋo eebobo fiine eba eku gonobenŋ, ore eru so roosoe nobeya. Moreŋ ŋiŋigo eebobononunji mango eteko roosoe nobena ine, inore yaunmoririji ya omaine fukena.

7 Ore eru uruŋu minobenŋ? Israel kufufunji posiine fukekiminŋo yamenŋ keku gobunyonŋ, posikekiminde fune oi so bofukebuŋ. Yoŋoji matayonŋ, Anutuji kubu mendaine roosoe nobeya, niŋoji yaunine oi bofukeru posiine fukebenŋ. Goineji mamane sembeneji manyanunŋ kejigame omaine kosa gogobi. 8 Ore buŋoine oi Biŋe Quraŋgo inji quraŋgabi pega, “Kubanjiŋojiŋo gobi Anutuji gemo so kipeme manyanunŋo rakame komiine fukebuŋ. Ya ŋoneru funine egu ŋone mukuniminŋ ore jiŋoyanunŋ bokobeko dabu eya. Buŋo kajeyanunji maneru egu mane taniŋaniminŋ ore oi kejiŋaya. Onu mutu go waperu daman yoo onʉakon mo kosa gogobi.”* 9 Kiŋ Deiwidji ore buŋoine inji miko pega,

“O Anutu, yoŋoji jebe rigaru ruaru noku kosa jerieegobi. Oo bofuke ŋone yaberu agiburanyanunde ore bitin rua yareigonŋ.

* 11:4: 1 Kiŋ 19.18 * 11:8: Dut 29.4; Ais 29.10

Yonoyanunde neneo odetatanḡaru waki yabeko geoine bokirie yabende joisereren maneinebi.*

10 O Anutu, go jinoyanun bokobende piku noneinḡo embimbinḡaniminḡ.

Go geoine bokirie yabende paiyanunḡo roperu yobinḡame jijiki daberu goinebi.”

Deiwidji onu onḡa wosiya.

Kotu kantri yonoji Anuture yo foriine fukebuḡ.

11 Jikigaru inḡi weugo: Juda kufufun foriine yonoji odetatanḡaru waki yabeko manyanunḡi ke-jigame fianiminde embimbinḡaniminḡ me mata? Oi so embimbinḡaniminḡ! Waki yabeya, oiji Anutu mane mukuinde anḡi sogo maneniminḡ ore fukeya. Juda kufufun foriine yonoji kadi odureru waki yabeko kotu kantri yonoji tifeyanun fukeru manyanun kerisieru Anuture binḡe fukebuḡ. Onu fukebuḡ, oiji manyanun bapakareko ore eru manyanun riganḡame manyanun kerisieniminde anḡiji fukein ore eru onu fukeya.

12 Juda kufufun foriine yonoji kadi ririru waki yabeko ore eru kotu moreḡine moreḡine yonoji senḡinbanḡin fukekiminde funḡe bofukebuḡ. Oi bofukeru manyanun kerisieru mifia maḡineo gogobiyon, Juda kufufun foriine yonoji mutu goku Anuture jinoo so sagagobi. Jiki Juda yonoji onuakon sosowo manyanun kerisieniminḡ. Onu fukeko Anuture mifiaji saueru boakon yobu to-togo fukein.

13 Nonji buḡone yo Juda nonore matayon, kotu kantri kufufun nonore migo. Nonji kotu

* 11:9: Kiki 69.22-23

kantri ñoñore sosore ñi aposol fukego ore “Gione tinabiñeineke fukega,” miku oñu manesugo. ¹⁴ Gione oi babe foriine fukeko mañ-ñañuñ kerisieegobi, nakene Israel kufufuñpuneji ore sunduine manenimiñgo yameñ keku añi sogo maneego. Biñe buño oiji moakon moakon yoñore manyañuñ bapakareko ore eru manyañuñ rigaṅgame manyañuñ kerisieniminde anji fukeko kerisiebi Anutuji munañ qa yareñ. Gione tinabiñeineke oi ore eru kotu kantri ñoñore botugo baego.

¹⁵ Anutuji Juda kubu ñadi nobeko ore foriineji inji fukeya: Kotu kantriine kantriine ñoñoji tifeyañuñgo fukebi Anutuji furinañuñ baku oga ñabeme ogopuine fukebuñ. Juda kufufuñ foriine yoñoji manyañuñ kerisiebi Anutuji munañ qa yareru mane sabareku oga yabeñ, ore foriineji oi komegone gboreru goku sanañganimiñ so fukeñ.

¹⁶ Gosa bobosu gariineo uqo Anuturo osoeru ruaru jeri ebenen gbagbataenine fukega ine, giore uqo munjañ sosowo oi oñuakon gbagbataenine fukega. Yo goduineji tiriine fukega ine, tienineji oñuakon tiriine fukegobi. ¹⁷ Juda kubu oi Anutu inoyonere oliwe yo fukega. Anutuji inoyonere oliwe yo oi foriine yobu roru tienine goine ketigame wakibuñ eru gomende oliwe yo tienine roru wareru botuyañuñgo ruame jikigaru sogueegobi. Kantri goine ñoño gomende oliwe yo oñu so fukegobiyon, Anutuji jibu oga ñabeme damañ yoo yo tienine fuñine mo yoñore botugo goku sanañgaegobi. Ñoño Juda kubure oliwe yo goduineone uqo obuine poreru noku sogueegobi.

18 Nono Juda ninjoke dimagobiyon, jibu Juda nodureru sakinanun egu ba ropenimin. Sakananun ba ropenobun ine, bunjo yo manebini: Kantri goine nono yo tienine akon onjine fukegobi. Nono godunonun so osigaegobiyon, ninjore yo goduineji oi osi njabeme dimagobi.

19 Bunjo inji minobun, “Anutuji nonun inyonunde yo botuineo rua nobein ore eru yo tienine oi ketigame wakiko sawaine fukeya.” 20 Bunjo oi foriine. Anutuji Juda ninjigo manyanun so kerisieru manesin gabun ore eru keti yabeko wakibunyon, nono mamananin-nanunjo odesingarun qin keru dimagobi. Onu dimaku jauba-irinbirin so fukeru sakipepe eru goinebiyon, inji egu waki njabein ore sombunanun maneru goinebi: 21 Anutuji inyonjere yoinere tien foriine so none yabe embon eru Juda kufufun keti yabeya ine, nono oi “Soine none nobe embon ein,” onu egu minimin. Omaine onjine manesuku kosa egu goinebi. 22 Ore eru kotu kantri nono Anuture funne manesuku inji minimin, “Juda ninjigo kadi ririru waki yabeya, Anutuji ore goine bokirieru fofori joineke eyareegayon, nonun bobian Rauineke qakatoru dimabenej bobian nobeega. Injoke so jikigarun dimakimin ine, kantri goine ninjo onjikon keti nobeme wakikimin.”

23 Onu soine miniminjon, Anutuji ninjigo kadi riribun, oi onjikon soine sanangaru yo botuineo moke jikiga yarein. Ore eru Juda kufufun yonjoi qoqomukuyanun bokeru manyanun kerisienimin

ine, oi soine Yesuke jikiga yarein. ²⁴ Anutuji n̄oŋo gomende oliwe yo oone keti n̄aberu ke sasarire kadi odureru oliwe yo funine more botugo ruaru jikiga n̄areya. Kantri goine n̄oŋo oŋuine eyareya ine, ore eru in̄oyonunde yo tienine foriine Juda kufufun̄ foriine oi afagaru oga yaberu an̄iineo in̄oyonunde oliwe yore botugo rua yabeme moke jikiganimin̄. Oŋu.

Anutuji Israel sosowo n̄onem̄in̄ norein̄go manega.

²⁵ O maŋkekerisie ogopune, n̄oŋo-n̄aŋunde maŋboron̄ paio kosa egu gonimin̄ ore buŋo sumun̄ine mo bararin̄ga n̄arebe mane taniŋganimin̄go manego. Buŋo oi in̄i: Mamane sembeneji Israel kufufunde mobe mo yon̄ore maŋyaŋun̄ kejjigame gogobiyon̄, damaŋ tatariine tomiri qoqomuku so jikigaru gonimin̄. Matayon̄, rone kotu kantri yon̄oreone boakon̄ yobu yon̄oji maŋyaŋun̄ kerisieru Anuture qoruman̄ maŋineo wapenimin̄. Oŋu ebi Anutuji jareyaŋun̄ n̄oneko sagain̄, damaŋ oo Juda kufufun̄ nin̄ore qoqomuku damaŋnon̄un̄ji tariko sosowo maŋyaŋun̄ kerisienimin̄. ²⁶ Maŋyaŋun̄ kerisiebi Anutuji Israel kufufun̄ sosowo munan̄ qa yareko qowirienimin̄. Ore buŋoine oi Biŋe Quraŋgo in̄i quraŋgabi pega,

“Munaŋqoqo Rauineji oi Zaion tukuone fukeru Jeikob kubu nin̄ore eebobo wuwun̄un̄ineke oi keririkein̄.*

* **11:26:** Ais 59.20

27 Anutu nonji agiburanyaŋuŋ kerikeru senŋinbaŋŋin bofukeniŋin ore jojofoburuine oi yoŋoke ebe moko gokimiŋ.”

Buŋo oŋu pega.*

28 Juda kufufuŋ foriine yoŋoji Bobiaŋ Biŋe ŋadi gaku Anuture rosipu fukebuŋ ore kantri goine ŋoŋoji tifeyaŋuŋgo Anuture ogopu fukegobi. Oŋu fukegobiyon, Anutuŋi Israel fuŋgbodupunonŋuŋ roosoe yabeya ore Juda niŋoji jikigaru yoro ogopuine foriine yobu fukegobeneŋ. 29 Anutuŋi ŋiŋigo mo roosoe yaberu yaunŋ yareega, buŋo oi moke maŋine kerisieme igokogaiŋ ore so mata. 30 Kotu kantri ŋoŋo oŋuakonŋ ronekonŋ Anuture mi so reŋgaru kosa gobuŋyon, Juda kufufuŋ foriine yoŋoji qoqomuku fukebuŋ ore eru Anutuŋi ŋoŋo ŋonemaŋiŋ ŋareme qowiriebuŋ.

31 Juda kufufuŋ foriine yoŋoji damaŋ yoo Anuture miqomukuru kosa go wapegobiyon, ŋoŋoji qowiriebuŋ ore eru Anutuŋi Juda kufufuŋ niŋo oŋuakonŋ damaŋ yoo ŋonemaŋiŋ nor-eiŋgo manega. Kotu kantri ŋoŋoji maŋ-ŋaŋuŋ kerisieru qowiriebi ore mosiineŋi maŋyaŋuŋ bapakareega, ore eru yoŋoji oŋuakonŋ afagaru maŋyaŋuŋ kerisieru ŋonemaŋiŋine biŋe qa yareniŋiŋ.

32 Niŋigo sosowo nonŋuŋ Anutu qomukuru kosa gobeneŋ buŋo qoqomukunonŋuŋ bofukeru niŋiŋ nobeya. Sosowo yobu ŋonemaŋiŋ noreiŋ ore eru niŋiŋji kipe nobeya. Oŋu.

Anutu miteŋ garu owaowa kiki iŋi keegobeneŋ:

* 11:27: Jer 31.33-34

33 Anutu yaunmoririinere rounji oi yasogo yobu fukega. Mamagore sia, mamaneine oi rarakaine tatariine tomiri. Manjboronjineji nodureru ropekiine yobu fukega. Inoji bujononun osoeru mitariega, nihoji oi sosowo mitanin forekimingo embimbingakimij. Gogononunde kadi burugaega, ore funjine oi maneru osoeru bofuke forekimingo so mata.*

34 “Ofonde manj kininere buru oi ninjigo sosowoji mane mukukimingo embimbingaru go wapebenj. Moji kajeqoun bujo otein ore so mata.”*

35 “Moren ninjigo yaun narengaren eegobeneyon, injoke onu ekimingo embimbingaru go wapebenj.

Ya otebeney tifeine so bokirie noreko soine sagaga. Ya mo jiki noreinde tife oteingo embimbingaegobeney.”*

36 Oi yoore eru embimbingaegobeney: Inoji ya sosowore Rau fukeru funqoduine fukega. Inoji ya sosowo manjo eteko fukeya. Oi injoyonunde kuriri bofukein ore eru fukeya. Ore eru nonun tinabinine mitej gabenej tatariine tomiri kuririineke pe roperu pein. Bujo oi foriine.*

12

Gogononun urunu gobenej Anuture sagainj?

¹ O manjkekerisie ogopune, Anutuji onu nonemainj noreya ore nonji manj-nanun inji

* 11:33: Ais 55.8 * 11:34: Ais 40.13 * 11:35: Job 41.11

* 11:36: 1 Kor 8.6

bapakarego: Nɔŋo ɲonemaɲine oi maɲ kininɲaɲunji manesuku ore so tifeine bokirieru ohoweine baku miteɲ garu goinebi. Oɲuakoɲ ɲoɲo-ɲaɲunde saki fu oi Anuture kikitin pesin ruainebi. Oɲu ruanimin ine, ɲoɲo gboreru gbagbataeɲine fukebi Anutuɲi pesin-ɲaɲun oi ɲoneme sagako aɲiine maneein.

² Rone morende eebobo sembenere buru boyoberu gobuɲyoɲ, damaɲ yoo oɲuine oi so jikigaru eku goinebi. Oɲu matayoɲ, maɲ mamaneɲaɲunji gboreko qowirieru goinebi. Oɲu goku Anutuɲi ɲoɲore aɲi uruɲu manega, oi baaru soine sanaɲgaru osoeru bofukenimin. Oi bofukeru ore so eenimin ine, kadi fiine boyobebi sagako kuririnɲaɲunke fukeenimin.

³ Jijibu kosa egu gonimin ore buɲo mo mibemin. Anutuɲi yaunmoriri nareme ore paio dimaku sosowo ɲoɲore inɲi ɲajigo: Nɔŋo ɲoɲo-ɲaɲunde manekabi ropekiine so fukeinɲoɲ, moakoɲ moakoɲ ɲoɲo poretin ɲoɲo-ɲaɲe mane muku goinebi. Anutuɲi mamanesin noreko ore foriine fukeega ore so ɲoɲo-ɲaɲe oosoe eru ore so buɲo miku goinebi.

⁴ Ore fuɲine oi inɲi: Saki funoɲunji moakoɲ fukegayoɲ, saki fu tifenonɲun oi kokoine. Mobeine sosowo yoɲoji gio moakoɲ oɲuakoɲ so baegobi.*

⁵ Ore so maɲkekerisie ɲinɲigo noɲun oɲuakoɲ kokoine gogobeneyoɲ, jibu Kristoke qakatoru dimaku saki fu oɲuine foriine moakoɲ fukegobeneyoɲ. Moakoɲ fukegobeneyoɲ, bubu niɲoji

* **12:4:** 1 Kor 12.12

jikigaru eru moko gio babeneŋ sagako dimagobeneŋ.

⁶ Anutuji yaunmoririine noreya ore so gio bore mamane yaun furuine furuine raugaru gogobeneŋ. Moji kajeqouŋ giore mamane yaun biŋe qoqo ega ine, iŋoji oi gioo ruaeine. Mamane-siŋineji otesiŋgaega ore so gioo ruaru Anuture buŋo miku goine.* ⁷ More kiŋaŋqoqo giore mamane yaun oteya ine, ore so goine daman so bapi yaberu goine. More qaqaŋji gio bainde mamane yaun oteya ine, iŋoji boseqosembe tomiri daman so goine qaji yareru goine.

⁸ More maŋ kikitin giore mamane yaun oteya ine, iŋoji daman so yameŋ keku niŋigo maŋyaŋuŋ bapakareru kitin yaberu goine. Goineji yare basiqasi baku embimbiŋgabi more oi kitin yabeinde mamane yaun oteya ine, iŋoji tuturiine tomiri daman so kitiŋgaku bapi yaberu goine. More siŋanyayabe giore mamane yaun oteya ine, iŋoji qin keru dimaku goine siŋaŋ yaberu goine. More manjijojoko giore mamane yaun oteya, iŋoji gio oi jeri paio baku goigon. Onu.

Manjokore kadi oi poretiŋ boyobeinebi.

⁹ Noŋo kiko bokeru poretiŋ manjijojoko naduŋgadun eku goinebi. Sembene misomben baku ŋadi gaku goinebi. Oroinere eŋareme oo qakatoru goinebi. ¹⁰ Maŋkerisie ogopuŋaŋuŋ oi waigo paiineo eyareku poretiŋ manjoko naduŋgadun eku goinebi. Araŋ qoqo naduŋgadun enimiŋgo yameŋ keegobi, oo anŋi sogo maneru mimiteŋ eru goinebi.

* 12:6: 1 Kor 12.4-11

¹¹ Maŋ-ŋaŋunji so gbaŋiru wirieinyon, onga wosibi Moro Tiriineji dobe ŋabeko jojoinেকে dimaku Ofonde gio baku goinebi. ¹² Ŋoŋo senŋinbaŋin bofukekimiŋgo odigaru oori eru jeri paio goinebi. Suroŋqoqo maneru kariyeru goinebi. Ŋoŋo damaŋ so dimaku Anutu onga wosigaru goinebi. ¹³ Anuture ŋinigo gbagbataeŋineji yare embimbiŋgagobi, oi bapi yaberu goinebi. Ŋoŋo ŋinigo kepore yaberu moko ŋeku uqo munjaŋ noku jeri eku goinebi.

¹⁴ Kekesuesue eŋareegobi, ŋinigo oi so qaiso yabeinebiyon, ŋoŋo Anutu onga wosigabi mifia ŋareein.* ¹⁵ Jeriegobi, yoŋoke bapi yaberu jerieinebi. Kuyogobi, yoŋoke bapi yaberu kuyoinebi. ¹⁶ Bio maŋmoakon eyareku womoo goinebi. Ŋoŋo-ŋaŋunde so manebi ropeine. Jauba-irinbirin so einebiyon, ŋinigo wakiqoqoine oi ogo eyareku goinebi. Ŋoŋo-ŋaŋunde manebi maŋboron ŋinigo gogobi ore so, so fukeine.*

¹⁷ Minde mibe, nunde gube, ende ebe oi more so einebi. Ŋinigo sosowoji mosi goine yoŋore manebi eebobo fiine fukegobi, oi yameŋ keku baku goinebi. ¹⁸ Ya more embinqombin so egobi, sasanan pe ŋarega ore so yameŋ keku ŋinigo sosowo yoŋoke womoo goinebi.

¹⁹ Buŋo mo oi Biŋe Quraŋgo inji quraŋgabi pega, “Nonji sembenere tife bokiriebe paiyaŋunjo ropein. Oi nonde gio. Ofon nonji onu migo.” Ore eru yoro ogopune, ŋoŋo-ŋaŋe sembenere geo

* **12:14:** Mat 5.44; Luk 6.28 * **12:16:** Qoq 3.7

so bokirieinebiyon, oi Anuture bokebi maņine rigaņgame iņore tife bokirieru bomuku ņabeiņ.*

²⁰ Ore eru oi ņoņo-ņane so bokirieinebiyon, Biņe buņo yo boyoberu goinebi, “Rosigoji uqore komega ine, oi uqo gume. Gore rosiji obure manega ine, oi obu otende noine. Oņu eku gore mosi fiine oiji maņ bapakare etende mimiine maneru bokena.” Buņo oi boyoberu goinebi.*

²¹ Moji mosi sembene oiji egu gbiņ egareiņyon, gake mosi fiine eru oiji gbiņ eteru mosiine sembene oi gboremiņ. Oņu.

13

Gawman yoņore buņo yukuyanungo raru reņgaru goinebi.

¹ Gawman mo oi iņoyoņe akon so fukeyayon, Anutu, usun Rauine iņoji oi gawman igodonĝako ore so Sogunenonunde usun paio dimaku siņan noreegobi. Mimiti giore kukure oi Anutu. Ore eru ņoņo sosowo ņoņo-ņanunde gawman yoņore buņo rurumaņgo raru goinebi. ² Funine oņu manegobi ore eru moji mimiti siņan yoņore usun qopiega, iņo Anutuji gogore buru ruaya, oi qopiega. Mimiti Rauine qopiegobi, Anutuji yoņore buņo mitariku geoine bokirie yareme yobiņ bofukeniņ.

³ Siņanbobo yoņoji ņiņigo eebobo sembene baegobi, oi kokoi mamane eyareegobiyon, fiine baegobi, oi oņuine so eyareegobi. Ore eru siņan usunyanunke yoņore kokoi maneiņgo manege me

* **12:19:** Dut 32.35 * **12:20:** Qoq 25.21-22

mata? Oi so maneŋgo manege ine, eebobo fiine eba eku gokande miteŋ gunimiŋ.

⁴ Gawman yoŋoji oi Anutu kiŋaŋ qa teru bobiaŋ gunimiŋgo manegobi. Oŋu manegobi ore ŋiŋigo sembene fukegobi, ore goine bokiriebi paiyaŋuŋgo ropeme yobiŋ manenimiŋ ore dimagobi. Anuture kiŋaŋqoqopu fukebi kambantire siqo sogo yareya, oi omaine yobu so baku gogobi. Ore eru ya sembene ege ine, go kokoi maneru goigoŋ. ⁵ Yobiŋ paiyaŋuŋgo egu ropeiŋ ore gawman miyaŋuŋ reŋgaru goinebi. Ore akon matayoŋ, Anuture jiŋoo oŋuakon sagaiŋgo ore oŋu eku goinebi. So reŋgabi Anuture maŋ rigaŋgame miko maŋ wombunyaŋuŋgo oŋu manebi maŋyaŋuŋji egu sembeaiŋ ore oŋuakon gawman yoŋore buŋo yukuineo raru goinebi.

⁶ Gawman yoŋoji oi Anuture gio mobe mo baku oo qiŋ keru dimaku siŋaŋ ŋabeegobi. Gioyaŋuŋ oi banimiŋ ore ŋoŋoji bapi yaberu takis oŋuakon eegobi. ⁷ Gawmande takis ruaru kikitin fuŋne fuŋne wojimu yarenimiŋ ore miegobi, oi sosowo ore so yareeinebi. Gawmande takis fuŋne fuŋne sosowo yareru komuniti gio oi poretiŋ baeinebi. Gawmande gio bobo ŋiŋigo yoŋore kobi eru aran ba yareeinebi. Oŋu.*

Damaŋ yasogoji bembengako jojoko naduŋgadun eru goinebi.

⁸ Oŋu eku more tife mo ŋoŋoke so eko goinebi. Jibu ŋoŋore tifeŋaŋuŋ moakon oi damaŋ so inji pega: Ŋoŋo manji jojoko naduŋgadun eku

* **13:7:** Mat 22.21; Mak 12.17; Luk 20.25

goinebi. Moji goine jojoko manyaun eyareega, injoji Kadi buño boyobe foreega.

⁹ Mimiti buño qoruine oi inji, “Gake manji jojoko eege, ore so goine sosowo manjoko eyareeigon.” Buño ore maŋgo mimiti buño yo onjuine pegobi, “Boesau so eigon,” “Ninigo mo so qande komein,” “Kian so baigon,” “Yare so sase eigon.” Oi eru mimiti buño goine sosowo oi buño qoruine ore meaineo fukegobi.*

¹⁰ Ninigo mo manji jojoko etege ine, inore ya sembene mo so eteigon. Ore eru manjoko eru onjuine oo mimiti buño sosowo renġaru boy-obege.

¹¹ Damaŋ yoore fuŋne mane mukugobi ore eebobo onjuine eba eku goinebi. Rone Kristo manesin garu maŋnonuŋ kerisiebeneŋ, damaŋ oo akon funġaru go wapebeneŋ Ofonji bomuku nobeko Sombuŋgo ropekimin, ore damaŋineji maŋfunġo ware forega. Ore eru ŋoŋo kuban pegobi, oone maŋ-ŋaŋuŋ gboreko pakareniminde damaŋ oi warega. ¹² Ubu joroine gobeneŋ wegı jinjoine jojirinġo wape tamainġo ega. Ore eru qisirire eebobo oi keririkebi wakiko tatamainere jigo qakiminde kuriri oi ro kebi rakame dimainebeneŋ.

¹³ Tatamare maŋgo gogobeneŋ ore so eebobo gbagbataeneŋe eba eku goinebeneŋ. Goineji jebe pati eru kanenji noegobi, onjuine noku obu sananeŋe noku bobojibu eegobi. Sau ekeson eru kosa ŋigo kian poreegobi. Pouguru roinġaru kekepari eru kiki rorori eru manji roroin maneru ŋaŋadi eegobi. Eebobo onjuine oi so sagaga.

* **13:9:** Eks 20.13-15, 17; Dut 5.17-19, 21; Lew 19.18

14 Maɲ sakire aɲi sanaɲine sembeneji gboreru pakerebi yokore aɲi egu reɲganimiɲ ore oi kaje so ruaru so manesuku yabeeinebi. Oɲu matayoɲ, Ofonɲ Yesu Kristo iɲore eeboboji oi tebe garikiɲ-ɲaɲuɲ fukeko oi mariku oɲuine keru goinebi. Oɲu.

14

Ogo gbagbaɲine oi so miyareru goinebi.

¹ Monde mamanansinji gbagbaɲine fukeko oi siɲaɲ maɲgo eyareru kepore teru goinebi. Inoke mimane eku migobobo buɲo fukeko ore eru pepesisiri so eku goinebi.* ² Goineji mamane-siɲyaɲunde so uqo munjaɲ sosowo soine noegobiyon, goine yoɲore mamanansinji gbagbaɲine fukeko uqo kuɲgaɲine akon noegobi. Maɲyaɲunji egu kejigaiɲ ore maɲyoka eru joma nemu gbom yoɲore pesiɲ ruruaine oi misomben eku munjaɲ akon iɲoyoɲe rigaru noegobi. ³ Uqo munjaɲ sosowo noegobi, iɲoji ogopuyaɲuɲ munjaɲ akon noegobi, oi mipemiriɲ so eyareru goinebi. Anutuji ogopuɲaɲuɲ uqo munjaɲ sosowo noegobi, oi oɲuakon “Sagagobi,” miku ɲonemaɲ eyareega. Ore eru munjaɲ akon noegobi, ɲoɲoji ogopuɲaɲuɲ yoɲore buɲo so mitariinebi.

⁴ Goji wamo fukeru more kiɲaɲqoqo mitari tenon? Inoji oi iɲoyoɲe rauinere jiɲoo buɲore mobe miko osoeru mitarime sagako dimaiɲ me yobiɲ paiineo ropeko wakiɲ. Ofonji sananɲaru qiɲ keru dimaiɲ ore kitiɲ gateeiɲ. Ore eru soine qiɲ keru dimaiɲ.

* 14:1: Kol 2.16

5 Goineji una kokoinere manesubi kamasiyanuṅ sogokonṅ egobiyonṅ, goineji unaine unaine osoeru una more manebi ropeko fuṅine mo fukeko una goineji ore mea yukuineo fukegobi. Nonṅo moakonṅ moakonṅ nonṅo-nṅanunde mamananego qakatoru oo manyoka sosowo yoberu koimo dimaku goinebi. 6 Goineji unaine unaine osoeru roperu wakiru ruaegobi, yonṅoji oi Ofonṅ tinabiṅe oteṅgo maneru eegobi. Goineji joma sosowo noegobi, yonṅoji Anutu miteṅ garu Ofonṅi onṅu tinabiṅeineke fukeṅ ore noegobi. Goineji joma goinere sowo goegobi, yonṅoji Ofonṅi tinabiṅeineke fukeṅ ore maneru oi eegobi eru onṅu goku Anutu miteṅ gaegobi. 7 Nonṅundeone moji inṅoyonṅere akonṅ so goga eru inṅoyonṅere akonṅ so komeṅ.

8 Ore fuṅine oi inṅi: Gariine gokimiṅ ine, gogononṅuṅ Ofondeo kisiṅgaru gokimiṅ. Komekimiṅ ine, Ofondeo komekimiṅ. Ore eru gokimiṅ me komekimiṅ ine, Ofonde biṅe fukegobeneṅ. 9 Kristoji komebuṅ eru jinṅoke gogobeneṅ, sosowo nonṅunde Ofonṅ fukeru goinṅgo ore komeru gboreya. 10 Anutuji sosowo oga noberu inṅoyonṅere buṅo koroino rua nobeko dimakimiṅ. Ore eru goine nonṅoji wamo fukeru maṅkekerisie ogopunṅanṅuṅ mitari yareegobi? Onṅuakonṅ ogopune goine nonṅoji wamore maṅkekerisie ogopunṅanṅuṅ goine oi mipemiriṅ eyareegobi? Pouguru roroṅ ebi mosinṅanṅuṅ oiji so sagaga.* 11 Ore buṅoine oi Biṅe Quraṅgo inṅi quraṅgabi pega,

* **14:10:** 2 Kor 5.10

“Ofoŋ nonji goku sananŋago, ore so buŋo foriine yobu inŋi ŋajigo: Nŋiŋigo sosowo ŋoŋo nonde jŋo maio dikanji keru miŋanŋunji Anutu nonŋ miteŋ nunimiŋ.”*

¹² Buŋo ore so nonŋunŋ sosowoji bubu eebobononŋunde sundu oi Anutu ojiru mitaniŋgabeneŋ osoe nobeiŋ. Onŋu.

Moji odetatanŋaru egu waki qaiŋ ore mane-suinebi.

¹³ Ore eru so jikigaru mimisembe eru buŋonŋanŋunŋ so mitariinebi. Maŋkekerisie ogopunŋanŋunŋ yoŋore kadio odetatanŋaru egu waki yabeiŋ ore ya mo oi so ruaeinebi. Ore buŋoine yameŋ keku mikipeinebi. ¹⁴ Uqo munjanŋ ya moji inoyonŋe akonŋ wuwununŋineke so fukegayonŋ, ŋiŋigoji yare manebi wuwununŋineke fukega, yoŋoyonŋunde akonŋ oi wuwununŋineke fukega. Nonji Ofoŋ Yesuke dimaku buŋo oi maneru ore eru manyoka mo so manego.

¹⁵ Anutuŋi uqo munjanŋ sosowo munanŋ qa foreko gbagbataeŋine fukegobiyonŋ, jibu ogopunonŋunŋ goineji sowobotuyanŋunŋ eru joma goine so noegobi. Kristoji yoŋore eru komeyayonŋ, goine ŋoŋoji wamore joma noku onŋuine oiji yoŋore maŋ bosembeaegobi? Onŋuineo ŋoŋo-ŋanŋunde anŋi boyobebi maŋkekerisie ogopunŋanŋunji ore eru beusembe bofukeegobi, onŋuine oo manji jojokore kadi oi so jikigaru boyobeegobi.

¹⁶ Mamane fiine pe ŋaregayonŋ, ore paiineo eebobonŋanŋunji kosa ebi goineji ore eru buŋo urugo miku miyareegobi. Onŋu egu eniminŋ

* **14:11:** Ais 45.23

ore ɲoɲo sisiɲaɲ eku goinebi. ¹⁷ Wamo uqo nokimiɲ eru wamo obu nokimiɲ, oiji Anuture qorumande moge so fukega. Ya oiji oi wawakiine fukega. Inore qorumaɲ maɲineo gogore fori oi inji: Moro Tiriineji dobe nobeko eebobo poretiɲ boyobebeneɲ womo qa noreko jerieru gogobeneɲ. Oiji mogeine fukega. ¹⁸ Uri yonɲoji oɲu eru Kristore kiɲaɲ qaegobi, yonɲoji Anuture jinoo sagabi ɲinɲigoji buɲoyaɲuɲ manebi saga yabeega.

¹⁹ Ore eru niɲo womo ee ebeneɲ maɲmoakonji saueiɲgo ore yameɲ keinebeneɲ. Oɲuine oo maɲnoɲuɲ bobiaɲgaru babasanaɲ einebeneɲ. ²⁰ Anutuji uqo munjaɲ sosowo munaj qa foreko gbagbataeɲine fukegobi, oi manegobeneɲyon, moji joma me uqo mo noko ogoinere manji ore eru sembeako yombeneɲine fukeko agiburaɲke fukega, oiji so sagaga. Moji goine yonore so manesuku inoyonere akon maneru kosa noga, inɲoji oɲuakon agiburaɲke fukeiɲ. Ore eru Anutuji yonore maɲyaɲuɲgo gio baya, goine ɲoɲoji gioine fiine oi uqore eru so bosembeainebi.

²¹ Ore eru maɲkokerisie ogopuɲaɲuɲ yonore eru jomare sowo goku wain obu oi so noku goinebi. Oɲuine oo moko bobobian enimiɲ. Oɲuakon maɲ-ɲaɲuɲji yare me yare eru sembeako agiburaɲke fukeru gbaɲiena, ɲoɲoji oi so einebi. Oɲu moko bobobian enimiɲ. ²² Pepesisiri buɲore mamananiɲine oɲu me oɲu pe garega, oi Anuture jinɲo maio sabareku goigon. Moji buɲo more “Sagaga,” miku oo qakatoru mane sanaɲgaru ore eru inoyonere so mimitari ega, inɲoji kiwaqawaineke fukega.

²³ Oi me oi mamanesiŋ paiineo so dimaku eegobeneŋ, oi sosowo agiburaŋ fukega. Ore eru moji uqo more manyoka eru jibu oi naga, iŋoji agiburaŋ eiŋ. Mamanesiŋ paiineo so dimaku nega ore Anutuji iŋore buŋo mitarime qunŋgaru yobiŋ bofukeiŋ. Oŋu.

15

Nyoŋo Kristore mamanesu boyoberu goinebi.

¹ Mamanesiŋnoŋunji sanaŋ qanqanine fukega, niŋoji noŋunde akoŋ kosa jerieru noŋunde aŋigo egu gokimiŋ. Goine yoŋore mamanesiŋji gbagbaŋine fukeko fogaturuŋgo kadi odureru poretiŋ so boyobeegobi, noŋuŋ oi manjijojoko eyareku yobiŋyaŋuŋ osiganimiŋ ore bapi yabeinebeneŋ. ² Noŋuŋ moakoŋ moakoŋ ogopunoŋunji fianimiŋgo so manesuku bapi yabeinebeneŋ. Oŋu eyareku manyaŋuŋ bobiaŋgabi sasaŋ bofukeniŋ. ³ Kristoji oŋuakoŋ iŋoyoŋere akoŋ iŋoyoŋunde aŋigo so jerieyayoŋ, Biŋe buŋo yoore so etebi goya, “Niŋigo buŋo fofoine miku go migareegobi, yoŋore buŋoji oi nuko joiserereŋine maneego.” Buŋo oŋu pega.*

⁴ Anutuji noŋunde ore aŋiine iŋi maneega: Noŋuŋ yameŋ keku sananŋaru dimaku Biŋe Quraŋ osegabeneŋ maŋnoŋuŋ kitiŋgako oŋuine oo seŋgiŋbaŋiŋ fukekimiŋgo odigaru oori eru gokimiŋ. Ore eru Biŋe buŋo sosowo ronekoŋ quraŋgabun, Anutuji ore so qaji noreiŋgo manega. Ore eru oi quraŋgabi pega. ⁵ Anutuji

* 15:3: Kiki 69.9

inoyonɛ maŋ-ŋaŋuŋ kitingako soine yameŋ keku sananɔaru dimainebe. Inoŋi Moroine ŋareme dobe ŋabeko botuŋaŋuŋgo manji kikipe eku Kristo Yesure mamanesu boyoberu goinebe.

⁶ Onu goku soine maŋmoakon paiineo miŋaŋuŋ qodureru Anutu, Ofoŋnoŋuŋ Yesu Kristore Mama oi miteŋ garu goinebe. Anutuŋi ŋoŋo onu eru gonimiŋ ore maneega. Onu.

Bobian Biŋeji kantri goineo raru wareya.

⁷ Kristoŋi ŋoŋo mane sabareku maŋgo enareega, ore so ŋoŋo oŋuakon maŋgo sisinaŋ eku goinebe. Anuture tinabiŋeji saueiŋ ore onu eru goinebe. ⁸ Nonji buŋo foriine yo mibemiŋ: Anutuŋi buŋoine buŋoine Juda kufufuŋ niŋore funɔbodupu yoŋore mikipeya, oiji foriineke fukeiŋgo maneya. Ore eru Kristo soreme Anuture Biŋe buŋo fofori sananɔaŋgo ore eru Juda niŋore botugo wakiru kiŋaŋ qa noreru goya. ⁹ Juda niŋo kiŋaŋ qa noreru goyayon, kantri goine yoŋoji oŋuakon inore ŋonemaŋ maneru ore eru Anutu miteŋ garu gogobi. Ore buŋoine oi Biŋe Quraŋgo ini quraŋgabi pega,

“Ore eru nonji kantri goine yoŋore botugo goku miteŋ guru tinabiŋegoŋi saueinde kiki keebemiŋ.”*

¹⁰ Ore buŋoine mo oi ini miku quraŋgabi pega, “Anutuŋi Juda niŋo roosoe nobeko kufufuŋine fukeru jerieegobeneŋ. Kantri goine ŋoŋo niŋoke jikigaru jerieru kokorian eru goinebe.”*

* **15:9:** 2 Sml 22.50; Kiki 18.49 * **15:10:** Dut 32.43

11 Ore buɲoine mo oi inji,
 “Kotu kantrire kubu sosowo ɲoɲo oi Ofonj mitenɲ
 garu goinebi. Kae so gogobi, ɲoɲo oi
 sosowo ‘Anutu danɲe!’ miku kiki keku
 goinebi.”*

12 Kajeqouɲ ɲi Aisaia inɲoji oɲuakonɲ ore buɲoine
 inji miko pega,

“Yo goduone gidaine pougaru pakarega, ore so
 ɲi tinaine Jesi inɲore osigidagone mo fukeru
 ɲinɲigo moreɲ so siɲaɲ yabeɲ.

Oɲu eyareme morende kufufuɲ sosowo yonɲoji
 bapi yabeɲgo odigaru oori eru gonimiɲ.”

Buɲo ranɲbanɲine oiji damaɲ yoo foriineke fu-
 keega.*

13 Moro Tiriinere usunji kitiɲ ɲabeko
 oorinɲanunji sananɲgaru sananɲ qanɲanɲine fukeɲgo
 manego. Ore eru oori Rauine Anutu inɲoji womo
 eyareku jeri sosowo oiji maɲ-ɲanunɲ bofuseine.
 Oɲu oɲga wosibe soine Anutu manesiɲ gaku
 seɲɲinɲbanɲinɲ bofukeniɲinɲgo odigaru oori eru
 gonimiɲ. Oɲu.

Buɲo sananɲine oi urunɲure quranɲgago?

14 O maɲkakerisie ogopune, nake ɲoɲore inji
 mane sananɲgago: ɲoɲo mutu so gogobiɲonɲ,
 Anutuɲi ya sosowo fiine oi maɲ-ɲanunɲgo ruame
 puseko mamane fuɲne fuɲne bofukeru oiji soine
 unɲsowonɲ buɲo qaji nadunɲgadunɲ enimiɲ ore so
 fukegobi. 15 Oɲu fukegobiɲonɲ, jibu buɲo oi egu
 niga ɲabeɲgo maneru ore fuɲine oi moke keg-
 bore ɲarego. Anutuɲi yaunɲmoriri nareko ore paio

* 15:11: Kiki 117.1 * 15:12: Ais 11.10

dimago ore koimo paiineo buŋo sanan qanqanine goine quraŋga ŋarego.

¹⁶ Ore fuŋine iŋi: Anutuji kotu kantri ŋoŋoji maŋ-ŋaŋuŋ kerisiebi Moro Tiriineji bagbagbaga yabeme gbagbataeŋine fukenimingo maneege. Rone boji rigabi kondunineji ropeko Anutuji jerieya, ore so damaŋ yoo Anutuji ŋiŋigo moreŋ so biŋeine fukebi ŋone yaberu jerieiŋ ore aŋi sogo maneege. Ore eru Bobiaŋ Biŋeine kantri goine yoŋore botugo misaueiŋgo miku gioine paineo ruame ore so mande giore siŋaŋ fukeru Kristo Yesure kiŋaŋ qaego.

¹⁷ Ore eru Kristo Yesuke qakatoru dimaku Anuture gio babe biŋeroro nareme sakine ba ropeku koimo dimago. ¹⁸ Kristoji kantri goine yoŋoji Anuture mi reŋganimiŋ ore maneru boburoru bapakare nuega, oiji maŋgo enareko buŋone miku eebobone baego. Buŋo goine kosa misaueinde koimo oi so pe narega.

¹⁹ Moro Tiriinere usunji maŋgo enareko mosi qoqowirie moge usunyanunke fukebuŋ. Nonji Jerusalem siti bokeru kantriine kantriine roregaru raru raru Yuopre siti mo tinaine Iirikum oo ropebe. Onu moreŋ so roregaru Kristore Bobiaŋ Biŋe oi mitaniŋga yare foreboŋ. ²⁰ Moji otuŋ sariko moji wareru inoyone piine ore paiineo baku buŋoineke fukeiŋ. Ore so moji Kristore buŋoji mamananinde otuŋ sari foreko dimaya, nonji wareru inore otuŋ paiineo ode sananaru dimaku manyanun jikigaru bobianaru basanan yabebemiŋgo useru gobon. Mande gio fuŋfunŋaine baku oiji kuririquraŋne

bofukeiŋgo yamenj keku gobonj. Ore eru ŋiŋigo uri yoŋoji Kristore tina so maneru mutu gobuŋ, nonji Bobian Biŋe yoŋore mitaniŋgabeminde aŋine sogo maneru gobonj. ²¹ Ore buŋoine Biŋe Quraŋgo iŋi quraŋgabi pega,

“Uri yoŋoji buŋoine so yajibi manebuŋ, yoŋoji goku oi ŋonenimiŋ. Uri yoŋoji fuŋine rone so maneru mutu gobuŋ, yoŋoji goku oi mane taniŋganimiŋ.”*

²² Gio oŋuineji kipe nuya ore damanj so ŋoŋoreo warebeminde embimbiŋgaru gobonj. Oŋu.*

Polji Rom rarare buruine ruaya.

²³ Oŋu gobonjoŋ, roregaru maŋbapakare gio fuŋfuŋgaine baku kae sosowo mane yabegobeneŋ, oo oi ba foreru gobonj. Mande gio fuŋfuŋgaine babemiŋ ore kaeine oi damanj yoo moke so pega. Oŋuakoŋ ŋoŋo ŋone ŋabebeminde aŋi maneru gobe gosa kokoine tariya. ²⁴ Ore eru kantri tinaine Spein rabemiŋ, ore ŋadiineo ŋoŋoreo warebeminde buru ruaru ŋone ŋabebemiŋ ore oori eru iŋi manego: ŋone ŋaberu ŋoŋoke jeri eru kokiine mo aŋibaŋi ŋebe bapi nubi soine kadi jikigaru Spein rabemiŋ.

²⁵ Oŋu manegoyoŋ, damanj yoo Jerusalem sitire kufufuŋ gbagbataeŋine kitiŋga yabekimiŋ ore oo rabemiŋ. Oo raru ŋoŋoreo warebemiŋ.* ²⁶ Masedonia eru Akaia prowins yoyoka yokore maŋkekerisie kufufuŋ kubuine kubuine yoŋoji Jerusalem sitire ŋiŋigo gbagbataeŋine bapi yarekiminde buŋo kipebuŋ. Anuture ŋiŋigo

* 15:21: Ais 52.15 * 15:22: Rom 1.13 * 15:25: 1 Kor 16.1-4

gbagbataenine wakiqoqoine gogobi, yoṅore buṅo kiperu pesiṅ kokoine soguine ruaru qodurebi oi roru raru yarebemiṅ.

²⁷ Oṅu ruaniminde manjeri maneru buṅo kiperu qoqodure pesiṅ yasogo oi ruabuṅ. Oṅu eniminde tife pe ṅareko ruabi soine sagaga. Anutuji Juda kufufuṅ mifia noreinde buṅo miko eko mifia oiji kotu kantriine kantriine sagaru paiyaṅuṅgo ropeko gogobi. Ore eru kotu kantri yoṅore tife eko mobeine bokirieru yaunṅyaṅunji Juda kufufunde wakiqoqoine bapi yabebi sagaga.*

²⁸ Nonji yaun oi roru raru meyaṅuṅgo ruabe gione oiji tariko ore ṅadiineo oi boke yaberu iqi akon ṅoṅoreo wareru ṅone ṅaberu ṅadio jikigaru Spein kantrigo rabemiṅ. ²⁹ ṅoṅoreo warebemiṅ, damaṅ oo Kristore mifia oi sosowo roru wareru ṅarebemiṅ. Oṅu mane mukugo.

³⁰ O maṅkerisie ogopune, nonji Ofon Yesu Kristoke qakatoru dimaku iṅi maṅ bapakare ṅabego: Moro Tiriineji manjoko eteru kitiṅ ṅabeega ore so nonde eru Anutu oṅga wosiru goinebi. Jogbasasanaṅ ego, oo manjokonaṅunji bapi nuru goinebi.

³¹ Judia prowinsgo raru ṅiṅigo Kristore qoqo-muku eegobi, yoṅore meo egu ropebemiṅ ore Anuturu oṅga wosibi dobu kipe narena. Oṅuakon pesiṅ yaun yasogo roru Jerusalem raru ṅiṅigo gbagbataenine yoṅore meo ruabe sagako anjiine manenimiṅgo ore oṅga wosiru goinebi. ³² Oṅu oṅga wosibi Anutuji anj oṅu manega ine, nonji jeri paiineo ṅoṅoreo wareru ṅoṅoke anjibanji ṅeku

* 15:27: 1 Kor 9.11

beufi enarebi gobemiŋ. ³³ Womo Rauine Anutu iŋoji sosowo ŋoŋoke dimaine. Buŋo oi foriine.

16

Momojo buŋo tatarine

¹ Ogonoŋuŋ Fibi (Foibe) iŋoji Senkria maŋkekerisie kufufunde gio bobo ŋigo fukega. Iŋoji Rom ŋoŋoreo wareiŋ, oi siŋaŋ maŋgo etenimiŋ ore weu ŋareru meŋaŋuŋgo ruago. ² Iŋoji ŋiŋigo kokoine eru non ŋuakonŋ bapi noberu goya. Ore eru Anuture ŋiŋigo gbagbataeŋineji ogopunoŋuŋ kepore yareegobeneŋ, ore so Fibiji wareme oi Ofonde tinao oŋga wosigaru keporeinebi. Ŋoŋoreo wareru ya more embimbiŋgako ore so bapiniŋ.

³ Ŋoe ŋonuŋ yoyoka Prisila eru Akwila Kristo Yesuke dimagobire, muranyokane oi nonde momojo mibi manenimi.* ⁴ Yokoji nonde eru gogoyakuŋ kisiŋgaru komenimi ore fukebu. Nonji akonŋ so miteŋ yapegoyonŋ, kantri goineo maŋkekerisie kufufuŋ kubuine kubuine yoŋoji oi oŋuakonŋ yokore ore danŋe miegobi.

⁵ Maŋkekerisie kufufuŋ piyakuŋgo tumaŋgaegobi, oi oŋuakonŋ nonde momojo mibi maneniŋ. Eisia prowinsgo gio babe foriine fuŋfuŋgaineji fukeko Epainetus iŋoji maŋine kerisieru Kristore biŋe fukeya, yoro ogone oi nonde momojo mibi maneŋi. ⁶ Mariaji ŋoŋore eru gio soguine baku goya, iŋore nonde momojo mibi maneŋi. ⁷ Andronikus eru Junias tifeyokane yokoji rone Kristoreo qakatobire nonji yokore

* **16:3:** Apo 18.2

ɲadigo maɲne kerisiebe ore ɲadio noke witi pigo goben. Aposol yoɲoji yokore ore manebi botuyanɲngo ropekiine fukegobire. Oi nonde momojo mibi manenimi.

⁸ Yoro ogone Ampliatuŝ Ofoɲke dimaga, iɲore nonde momojo mibi manein. ⁹ Neɲanoɲuɲ Urbanuŝ Kristoke dimaga eru yoro ogone Stakiŝ yoko nonde momojo mibi manenimi. ¹⁰ Apeleŝ Anutuɲi eesoŝ oteme sagako Kristoke ɲakatoru dimaga, iɲore nonde momojo mibi manein. Aristobuluŝke pi moko gogobi, yoɲore nonde momojo mibi manein. ¹¹ Tifene Herodion iɲo nonde momojo mibi manein. Narsisuŝke Ofoɲke ɲakatoru pi moakoɲ gogobi, yoɲo nonde momojo mibi manenimin.

¹² Trifina eru Trifosa ɲigo yoyoka yokoɲi gio yasogo baku Ofoɲke dimagobire, yoko nonde momojo mibi manenimi. Yoro ɲigo ogone Persis iɲoji Ofonde gio soguine yobu baku goga, iɲo nonde momojo mibi manein. ¹³ Rufuŝ iɲoji Ofonde gio fiine yobu baega eru iɲore maɲgo damaɲ so noɲ oɲuakoɲ madeine oɲuine siɲaɲ maɲgo enareku goya, yokore nonde momojo mibi manenimi.*

¹⁴ Asiɲkrituŝ, Flegon, Hermes, Patrobaŝ, Hermaŝ eru maɲkekerisie ogo goine yoɲoke dimaku gogobi, yoɲore nonde momojo mibi manenimin.

¹⁵ Filologuŝ, Julia, Nereuŝ seɲineke eru Olimpiŝ eru ɲiɲigo gbagbataenine goine sosowo yoɲoke gogobi, yoɲore nonde momojo mibi manenimin.

¹⁶ Maɲkekerisie ogopunoɲuɲ yoɲore botugo kokobo eru meayanɲuɲ soseku miɲeriyanɲuɲ eku

* **16:13:** Mak 15.21

goinebi. Kristore maŋkekerisie kufufuŋ sosowo yoŋoji momojoyaŋuŋ ruabi ŋoŋoreo foga. Oŋu.

Uŋsowoŋ buŋo tatarine

¹⁷ O maŋkekerisie ogopune, nonji maŋ-ŋaŋuŋ iŋi bapakareru ŋajigo: Ŋiŋigo goineji maŋ ro-roiŋ fukeiŋ ore qoru qaegobi, yoŋore eru sisiŋaŋ eku goinebi. Maŋmoakonde mosi fiine qaji yarebi manegobiyoŋ, buŋo oi qomukuru pepe-sisiri buŋo goine oiji maŋ-ŋaŋuŋ bapakarebi sembeako quŋgaru wakiegobi. Ŋiŋigo oŋuine oi boke yaberu jojorigo goinebi. ¹⁸ Ŋiŋigo oŋuineji noŋunde Ofon Kristore gio so baegobiyoŋ, yoŋoyaŋunde aŋire so fukeiŋ ore gigiraŋ miku yoŋoyoŋe kiŋaŋ qaegobi. Jiji buŋo fiine fiine aŋiineke miku ŋiŋigo kikoyaŋuŋ tomiri yoŋore maŋyaŋuŋ bapakareru eadu yabeegobi.

¹⁹ Ŋoŋo Bobiaŋ Biŋe reŋgaru boyobeegobi, buŋo oi sosowo niŋore kajego rakame manegobeneŋ. Ore eru nonji ŋoŋore eru mokemoke yobu jerieego. Oŋu egoyoŋ, ŋoŋo iŋi eru gonimiŋgo manego: Ŋoŋo sembene baniminde maŋgboroŋ-ŋaŋuŋ bokebi wakiŋ. Gio oroine baniminde maŋgboroŋ-ŋaŋuŋ oi damaŋ so kegboreru bosogueinebi. ²⁰ Womo Rauine Anutu iŋoji Satan pipa odejaŋgako ŋoŋore yukuo wakiko kokoriaŋ eru jerieru gonimiŋ.

Ofonŋoŋuŋ Yesure yaŋuŋmoririji ŋoŋoke peine.

²¹ Nonde muraŋ Timoti iŋoji momojoine ruame ŋoŋoreo foga. Nonde tifepune Lusius, Jeison eru Sosipater yoŋoji oŋuakoŋ momojoyaŋuŋ ruabi ŋoŋoreo foga.*

* **16:21:** Apo 16.1

²² Tertius nonji Polre buᅇo maneru quraᅇ yoo quraᅇgago, nonji oᅇuakoᅇ Ofonᅇke dimaku momojone ruabe ᅇoᅇoreo foga.

²³ Gaiusji piine mitarime gobe maᅇkekerisie kufufuᅇ sosowo yoᅇoji oᅇuakoᅇ yoo wareru tumangabi uqo aᅇibanji enoreega, iᅇoji momojoine ruame ᅇoᅇoreo foga. Erastus iᅇoji sitire siᅇaᅇ muraᅇinere ofis maᅇgo takis monᅇ siᅇaᅇ gaega eru maᅇkekerisie ogonoᅇuᅇ Kwartus yokoᅇi momojoyakuᅇ ruabire ᅇoᅇoreo foga.* ²⁴ Ofonᅇoᅇuᅇ Yesu Kristore yaunᅇmoririineji ᅇoᅇoke peine. Buᅇo oi foriine.

Ofoᅇ miteᅇ garu iᅇi oᅇga wosiego:

²⁵ Bobiaᅇ Biᅇe buᅇo foriine oi ronere ronekoᅇgo go wapebuᅇ, oo soᅇsoᅇgo peya. Oᅇu peko Yesuji wakiru barariᅇga noreru mitaniᅇgako maneru misaueego. Biᅇe buᅇo ore so Anutuᅇi sanangaru mamanesiᅇ-ᅇaᅇuᅇ basanangako soine qiᅇ keru dimaku sanangainebi. Ore eru noᅇuᅇ Anuture tinabiᅇe miteᅇ gabeneᅇ saueeiᅇ.

²⁶ Rone Biᅇe buᅇo foriineji sumuᅇineo pe wapeyayoᅇ, damaᅇ yoo kajeqouᅇ ᅇiᅇigo quraᅇ quraᅇgabi pega ore so totogo fukeya. Anutuᅇi damaᅇ so go waperu tatariine tomiri go ropeiᅇ, iᅇoji ᅇiᅇigo kubuine kubuine noᅇuᅇ maᅇnoᅇuᅇ kerisieru Biᅇe buᅇo manesiᅇ garu reᅇgaru gokimiᅇgo manega. Ore eru gio iᅇi bakimiᅇ ore mitiga noreya, “ᅇoᅇo raru moreᅇ so roregaru Biᅇe buᅇo mitaniᅇgaru goinebi.” Buᅇo

* **16:23:** Apo 19.29; 1 Kor 1.14; 2 Tim 4.20

ore so niŋoji Biŋe buŋo oi ŋiŋigo kubu sosowo manenimiŋ ore mitaniŋgaru gobeŋ.

²⁷ Anutu inoyoŋe akoŋ maŋboronŋ Rauine fukega, nonuŋ Yesu Kristore tinao inore tinabiŋe miteŋ gabeneŋ damaŋ tatariine tomiri kuriri-ineke pe roperu peiŋ. Buŋo oi foriine.

YEESUS OPOR ELIWA
The New Testament in the Mauwake Language of
Papua New Guinea
Nupela Testamen long tokples Mauwake long Niugini
Copyright © 1998 The Bible Society of Papua New Guinea

Language: Mauwake

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-24

PDF generated using Haiola and XeLaTeX on 11 Nov 2022 from source files dated 9 Oct 2020

8f58ca10-b9a9-526e-979e-c3f5d5f85555